

TUTÚ NÍ CADÚHA TÉ PǼBLÚ QUIHIⁿ NDAHA ÑÁYIU ÑUÚ RÒMÁ

*Té PǼblú cáduha-dé tutú quihiⁿ ndaha ñáyi
xñndecu ichi Xítóhó Jesucristú ndécú ñúú Ròmá*

¹ Yúhú té PǼblú xínú cuèchi-í núú Xítóhó Jesucristú, chi mee Yǎ Ndiǒxí ní cachí-gá sá cúu-í ìⁿ téé cáháⁿ tnúhu-gá núú ñáyi, te tnúhu-gá cúu-xí tnúhu sá càháⁿ nàcuáa naníhí tǎhú-ó, núú ñu-gá ní tendaha ñaha-gá xii-í xícá cùu-í càháⁿ-í tnúhu-gá.

² Te ndéé ñanaha ñí cachí Yǎ Ndiǒxí sá dàcuítí sáá nduu ngñndecu ndíhi ñáyi tnúhu-gá. Te ducaⁿ ñí xáhaⁿ-gǎ xii cue téé ní cáháⁿ tnúhu-gá dàvá-áⁿ ñí chídó tnùní-güedé núú tütú-gá. ³ Te tnúhu-gá sá càháⁿ-í-a càháⁿ-xi ñu-ni cuèndá Xítóhó Jesucristú Yaá cúú Dèhe-gá. Te Dèhe-gá-áⁿ cúu-gǎ ìⁿ ñáyi, te cùu-gá ñani tnáhá ndí Dáví. ⁴ Te cùu-gá Yaá ñá túú tnàhí cuéchi-xi. Te ní xíhí-gá te ní ndoto-gá, te xǎⁿ cútnùní iní-ó sǎ cúu-gǎ Dèhe Yá Ndiǒxí, te ío càhnu cuu-gá. ⁵ Te ñu-ni Xítóhó Jesucristú ní quide-gá ní nduu tǎhù-í núú Yǎ Ndiǒxí sá càháⁿ-í tnúhu-gá núú cuè ñáyi ñuyíu-a cuèndá quíndáá iní-yu tnúhu-gá te canchicúⁿ nihnú-yu cadá-yu nchaa nàcuáa càháⁿ-xi, te ducaⁿ ño cuu càhnu-gá. ⁶ Te tnàhá nchòhó cúu-ndó ñáyi sa nchícúⁿ nihnu quide-ndo nchaa nacuáa càháⁿ tnúhu-áⁿ, chi ní cachí Yǎ Ndiǒxí sá nchòhó tnahá tnúhu-ndo ndíhi Xítóhó Jesucristú. ⁷ Te nchòhó

ñáyiú xĩndecu ñuú Ròmá, ñáyiú ío cùu iní ñáhá Yă Ndiöxí, càdúha-í tutú-a daquixi-í ndaha-ndo. Te ðiu-ni nchòhó cúú-ndó cuè ñáyiú ní cachí Yă Ndiöxí cada ndáá cundecu-ndo nũú-gă. Te xicáⁿ táhù-í núú Tătá-ó Dütú Ndiöxí ndihí núú Xítohó Jesucristú sá ïo na chĩndee chitúu ñaha-gă xii-ndo, te ducaⁿ ndì nduú-gá ná càda te ío váha cuu iní-ndó cùndecu-ndo.

Té Păblú cuiní-dé quíhíⁿ ngoto-dé cue ñáyiú xĩndecu ichi Xítohó Jesucristú ndécú ñuú Ròmá

⁸ Te díhna nuu-gă càchí tnúhu-í xii-ndo sá ïo ndàcáⁿ táhù-í núú Yă Ndiöxí cuendá sá ïo sàndáá iní-ndó-gă, te nchaa ñáyiú nihí-yu tnúhu sá dúcáⁿ quide-ndo. Te Xítohó Jesucristú dáyaha-gă nchaa tnúhu càháⁿ-í núú Yă Ndiöxí. ⁹ Te ndi tnahá òré càháⁿ ndihí-í Yă Ndiöxí ducaⁿ-ni xicáⁿ táhù-í núú-gă cuendá-ndó, te mee-gă náhá-gă sá càháⁿ ndáá-í, te ðiu-ni núú-gă xínú cuèchi-í ni yùhu ni iní-í, chi càháⁿ-í nàcuáa ní quide Déhe-gă Xítohó Jesucristú cuendá naníhí tãhú-ó. ¹⁰ Te xicáⁿ táhù-í núú Yă Ndiöxí sá nũu mee-gă ná càchí te sáá ïⁿ nduu quixi coto ñaha-í xii-ndo. ¹¹ Chi ío cuiní-í cundecu ndihí ñaha-í xii-ndo dànehé ñáhà-í ïⁿ ũú tnúhu nàcuáa ío-gă chĩndee ñàha Espíritú Yă Ndiöxí xii-ndo, te ducaⁿ ïo-gă cuita nducu ndèe-ndo cada-ndo nchaa nacuáa cuiní-gă. ¹² Te ío chí ná cuãha tñaha-o tnúhu ndee iní cundecu-o ìchi-gă, chi nchòhó ndihí yúhú ío sàndáá iní-ó-gă.

¹³ Te nchòhó ñáyiú ndècu ndihí-í ichi Xítohó Jesucristú na càchí tnúhu-í xii-ndo sá dúcáⁿ-ní ïo sàni iní-í quixi coto ñaha-í xii-ndo. Te cuiní-í sá òré quixi coto ñaha-í xii-ndo, te vá cuíta chiuⁿ quixi-í òtátná quidè-í òré sãngoto-í nchaa ñáyiú dava-gă

ñúú ñá túú x̄ta ch̄uⁿ-í chi ío váha sàhúuⁿ-yu tnúhu càháⁿ-í, dico ñá ndácù-í quixi-í quixi coto ñaha-í xii-ndo. ¹⁴ Te yúhú yídiquì-í cáháⁿ-í tnúhu Xítohó Jesucrìstú núú nchàa ñáyiú càháⁿ tnúhu grìégú, ndihì núú nchàa ñáyiú càháⁿ dava-gá núú tnúhu, ndihì núú nchàa ñáyiú túha, ndihì núú nchàa ñáyiú ñá túú tũha. ¹⁵ Te cuèndá sá dúhá yídiquì-í cáháⁿ-í tnúhu-gá, x̄áⁿ ío cuìní-í danèhé ñáhà-í xii nchaa nchòhó ñáyiú ñúú Rómá nàcuáa ndùu tnúhu sá càháⁿ nàcuáa naníhí tàhú-ó.

Ío cùnuu tnúhu Xítohó Jesucrìstú

¹⁶ Te yúhú ñá túú tnàhí cùcahaⁿ núú-í cáháⁿ-í tnúhu Xítohó Jesucrìstú, chi cùu-xi tnúhu ío cùnuu, chi Yá Ndiõxí ní cachí-gá sá ncháá ñáyiú na quìndáá iní-xi tnúhu-áⁿ te naníhí tàhú-yu. Te ní cachí-gá sá ñhnanuu-gã ñáyiú isràél ngúndecu ndihí-yu tnúhu-áⁿ te dàtnùnì ngúndecu ndihì ñáyiú ñá túú cùu ñáyiú isràél. ¹⁷ Te tnúhu-áⁿ dánèhé ñáhá-xì x̄i-o sá cúdiu-o núú Yá Ndiõxí te núu mee-nì sá quìndáá iní-ó-gã dàtná càháⁿ-xì núú tütú-gá núú càchí-xi: “Nchaa ñáyiú sàndáá iní ñáhá x̄i Yá Ndiõxí cúdiu-yu núú-gã, te ndècu ndihì ñáhá-yu xii-gá”, duha càchí-xi núú tütú-gá.

Nchaa ñáyiú ndècu ñuyú ndècuéchi-yu

¹⁸ Te ndéé andiú tëndaha Yá Ndiõxí sá ùhú quixi sá cúu-xì nchàa ñáyiú ñá túú quide ndáá núú-gã, ñáyiú quide nchaa sá cuèhé sá dúhá. Te cuèndá nchaa sá quidè-yu-áⁿ x̄áⁿ ñá túú cuìní-yu tní-yu tnúhu ndáá tnúhu Yá Ndiõxí cuèndá cuu-xi ñⁿ sá vâha sá cúu-xì-yu. ¹⁹ Te cuèi ducaⁿ quidè-yu dico cùtnunì ndáá iní-yu nàcuáa ndùu sá sání iní

Yă Ndiöxí ndihî nàcuáa ndùu sá quidé-gă dàtná cútñùní iní nchaa dava-gá-yu, chi ñu-gă dánèhé ñáhá-gă xií-yu. ²⁰ Te ni vă ndácú-ó quíní núú-ó năsa càa-gá, te ni vă ndácú-ó quíní-ó năsa càa iní-gá, te ni vă ndácú-ó quíní-ó năsa quide-gá táxí tñùní-gá nchaa nduu nchaa quíú. Te cuëi ducaⁿ dico ndéé cútñàhá ní ngáva ñuyíú ñí ngüita nchaa ñáyiu tècú tñùní váha-yu nàcuáa ndùu sá sání iní-gá ndihî nàcuáa ndùu sá quidé-gă te ducaⁿ tècú tñùní-yu cuendá nchaa sá ñí cadúha-gá ndéhě-yu ío ñuyíú-a, núu xíăⁿ vá càchí-yu sá ñà túú cuëchi-yu. ²¹ Te cuëi ducaⁿ ñí cutñùní iní-yu cuendá Yă Ndiöxí dico ñà túú cuíní-yu canehé-yu sá yíñùhu núú-gă nàcuáa tàú-xi cunduu. Te ni ñà túú cuíní-yu ndacáⁿ táhũ-yu núú-gă cuendá nchaa sá vâha quide ñaha-gá xií-yu, chi mee-ni nchâa sá ñà túú vèdana nândihî ñùhu iní-yu. Te quidé-yu dàtná quidé ñⁿ ñáyiu ñà túú ndècu ndihî nchaa sá xìní tñùní-xi. Te uuⁿ-gá uuⁿ-gá tá quidé-yu cuáháⁿ. ²² Te càchí-yu sá cùú-yu ñáyiu ío váha sàá sá xìní tñùní-xi dico ñà ndàá, chi cùú-yu ñáyiu ío ñí ñíquí-xi. ²³ Te ñà túú cuíní-yu cáháⁿ-yu sá ío càhnu cuu Yá Ndiöxí Yaá ndécú nchâa nduu nchaa quíú, chi da nchaa sá ñí cadúha mèé-yu quide cahnú-yu. Te ní cadúha-yu nchaa sá nàhá ñáyiu ñà túú cùdí ndècu ñuyíú-a. Te ní cadúha-yu sá nàhá quiti ndáva, ndihî sá nàhá quiti sàcuíta ñuhu mee-xi, ndihî sá nàhá nchaa dava-gá quiti, nchaa xíăⁿ quidé càhnú-yu.

²⁴ Te xíăⁿ núu ní dáñá Yă Ndiöxí quidé-yu nchaa sá cuèhé sá dúhá sàni iní-yu. Te xíăⁿ ío quide ndihî tnahá-yu sá cuèhé sá dúhá sàcúú-xí yiqui cuñú-yu.

25 Te ducaⁿ quidé-yu chi ñá túú sàndáá iní-yu tnúhu ndáá tnúhu Yá Ndiöxí. Te mee-ni tnúhu ndehnde sàndáá iní-yu, te nèhé-yu sá yíñùhu núú dàva sá ní cadúha-gá ío ñuyíú-a ndihí dava sá ndèé andiù te quide cahnú-yu, te ñá túú cächí-yu sá méé-gă ío cahnú cuu-gá, dico mee-gă xíní ñùhu-xi cáháⁿ-yu sá ío cahnú cuu-gá ni caa ni quíhíⁿ. Te ndáá ndisa sá ío cahnú cuu-gá.

26 Te sá dúcáⁿ ñà túú quide váha-yu núu xíáⁿ ní dáñá-ñă Yă Ndiöxí quidě-yu nchaa sá cuèhé sá dúhá sàni iní méě-yu. Te dava ñáyiù dîhí cáháⁿ ndihí tnàhá-yu ndi mèè dîhí-yu te ñá túú quidé-yu nàcuáa ní nduu táhũ-yu cadá-yu. 27 Te ñiù-ni ducaⁿ xíquide dava cue téé chi sàni cuèhé sání dùha iní-güedé sá cúú-xí yìqui cuñú-güedé ndi mèè tnaha téé-güedé, chi cáháⁿ ndihí tnàha ndi mee-güedé te ñá túú quide-güedé nàcuáa ní nduu táhú-güedě cada-güedé, te sá dúcáⁿ quide-güedé te ñá túú tnàhí cùu váha iní-güedé ndécú-güedě, te ducaⁿ tnàhí tàú-xi ndoho-güedé cundecu-güedé.

28 Te ñá túú tnàhí ñùhu iní-yu Yá Ndiöxí nõu xíáⁿ duuⁿ duuⁿ ní dáñá ñihnu ñaha-gá xií-yu sàni cuèhé sání dùha iní-yu, te quidé-yu nchaa sá ñà túú tàú-yu cadá-yu. 29 Te nchaa núú să cuèhé sá dúhá cùnũu quidé-yu. Te cue téé cáháⁿ ndihí-güedé ñáyiù dîhí te ñá díú ñàdîhí-güedé cúũ-yu. Te ñiù-ni ducaⁿ xíquide cue ñáyiù dîhí chi cáháⁿ ndihí-yu cue téé te ñá díú yî-yu cùu-güedé. Te mee-ni să ñà túú vâha quidé-yu sá cúú-xí tnàha ñáyiú-yu, te xihó-yu cundecu ndihí-yu sá ndécú ndihí dava-gá tnàha ñáyiú-yu, te ío sàni cuèhé sání dùha iní-yu

sá cúu-xí tnàha ñáyiú-yu, te ío cuédú ínì-yu, te sàhni tnahá-yu, te ío plètú-yu, te dándahú tnáhã-yu, te cùu úhú ínì-yu cue tnàha ñáyiú-yu, te ío yiti yùhú-yu. ³⁰ Te càháⁿ cuèhé-yu cuendá nchaa dava-gá tnàha ñáyiú-yu, te cùu úhú ínì-yu Yá Ndiõxí, te xio xio cùnì-yu cunuu tnúhu-yu, te mee-ni sàni ínì-yu sá ïo váha cunduú-yu, te ío quìde cahnú-yu mèé-yu, te ío sàni ínì-yu sá cádá ùhú-yu tnàha ñáyiú-yu, te ñá túú sàndáá ínì-yu ni tãtã-yu ni nãñã-yu. ³¹ Te ñá túú tècú tnùnì-yu sá vãha, te ñá túú quìdé-yu ìⁿ sá càháⁿ-yu, te ñá túú cùu ínì-yu ni ñáyiú cùu ndi meé-yu, te ni dàva-gá tnàha ñáyiú-yu, te ñá túú quìde cahnu ínì-yu ìⁿ sá cúmãní nùú tnáhã-yu, te ni ñã túú cùndahú ínì-yu tnàha ñáyiú-yu. ³² Te Yá Ndiõxí ní cachí-gá sá ncháá ñáyiú ducaⁿ xíquide quíhíⁿ-yu núú ùhú núú ndàhú. Te xìnì-yu sá Yã Ndiõxí daquìhíⁿ ñáhã-gã xií-yu núú ùhú núú ndàhú sá dúcáⁿ quìdé-yu, dico uuⁿ-gá quídě-yu chi váha-gá cúu ìnì-yu cue ñáyiú quìde datná quídé mèé-yu.

2

Yá Ndiõxí cada ndáá-gá cuéchi nchaa ñáyiú ndècu ñuyúú

¹ Te nchòhó ñáyiú càchí sá ïo ndècu cuéchi dava-gá ñáyiú tnahá-ndó ïo ndècu cuéchi-ndo cuèi nágá ñáyiú cùu-ndo, chi tnahá-ndó quìde-ni-ndo nchaa nacuaa quìde dava-gá ñáyiú càchí-ndó ndècu cuéchi-xi, te sá dúcáⁿ càháⁿ-ndó sã ndécú cuéchi ñáyiú-áⁿ te dàcaa-ndo cuéchi díquí-ndó chi tnahá-ndó quìde-ndo datná quídě-yu. ² Te nchoo xìnì-ó sã Yã Ndiõxí ío váha cùnùnì ínì-gá

nàcuáa cada ndáá-gá cuéchi ìⁿ ìⁿ nchoo ñáyiú ndècu ñuyíú-a, chi daquìhíⁿ-gá nchaa ñáyiú quide nacuáa ní cáháⁿ-í núú ùhú núú ndàhú. ³ Te nchòhó ñáyiú ìⁿ-ní quide ndìhì ñáyiú càchí mée-ndó sá ndécú cuèchi-xi dacuítí sá ná chǎhu-ndo núú Yǎ Ndiǒxí sá dúcáⁿ quide-ndo. ⁴ Te ñá túú cùu váha iní-ndó sá Yǎ Ndiǒxí cùndàhú iní ñáhá-gǎ xii-ndo, te ni ñà túú cùu váha iní-ndó sá ïo cuìní-gá cada càhnu iní-gá nchaa sá ñà túú váha quide-ndo, te ni ñà túú quide cuendá-ndó sá Yǎ Ndiǒxí quidé váha ñaha-gǎ xii-ndo cuèndá cuìní-gá sá nchòhó ndixi túu iní-ndó sá ñà túú quide váha-ndo ndècu-ndo. ⁵ Te nchòhó cúú-ndó ñáyiú ío sàà iní-xi, chi ñá túú cuìní-ndó ndixi túu iní-ndó sá ñà túú quide váha-ndo ndècu-ndo, te xǎⁿ núu ío-gá tá cùu vai tnúndòho sá cúú-xí-ndó. Te na sàà nduu tnúhu ndòho tnúhu ndàhú te ío ndoho-ndo, chi Yá Ndiǒxí cada ndáá-gá nàcuáa ndùu cuéchi-ndo. ⁶ Te dàvá-áⁿ cada ndáá Yǎ Ndiǒxí nchaa nàcuáa ndùu nchaa sá ñí quide ìⁿ ìⁿ ñáyiú ndècu ñuyíú-a. ⁷ Te nchaa ñáyiú nchìcúⁿ nihnu-ni quide mee-ni sá váha, ñáyiú-áⁿ nduu táhù-yu cundecú-yu ndìhì Yá Ndiǒxí ñi caa ñi quíhíⁿ, te ducaⁿ quide váha-yu chi cuìní-yu sá Yǎ Ndiǒxí cuu váha iní ñáhá-gǎ xii-yu, te cuìní tucú-yu nduu táhù-yu núú ïo váha càa ndecu Yá Ndiǒxí cundecú-yu ñi caa ñi quíhíⁿ. ⁸ Te ío cùdééⁿ-gǎ núú nchàa ñáyiú ñùhu iní mee-ni sá cúú-xí mée-xi, te ñá túú sàndáá iní-yu tnúhu ndáá chi mee-ni sá cuèhé sá dúhá quidé-yu. ⁹ Te nchaa ñáyiú ducaⁿ xǐquide ío ndíhú iní-yu. Te díhna-gá ñáyiú isràél ngüíta-xi ndohó-yu, te dǎtnùní ngüíta-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quide

váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ñ quide váha-yu, te ío váha cuu iní-yu cundecú-yu. Te díhna-gá ñáiyu isràél ñáiyu ní quide váha ducaⁿ càda ñaha-gá xii-yu, te dǎtnùní ducaⁿ càda ñaha-gá xii ñáiyu ñá túú cùu ñáiyu isràél ñáiyu ní quide váha.

11 Te ñá túú quide cuendá-gá cuèi náí ñáiyu cùú-yu. 12 Te nchaa ñáiyu ndècu ndihí nchaa tnúhu ní chídó tnùní ndíi Moisés, Yá Ndiöxí cada ndáá-gá cuéchi-yu nàcuáa càháⁿ nchaa tnúhu-áⁿ. Te nchaa ñáiyu ñá túú ndècu ndihí tnúhu ní chídó tnùní ndíi-áⁿ, Yá Ndiöxí vá cáda ndáá-gá cuéchi-yu nàcuáa càháⁿ nchaa tnúhu-áⁿ. Dico nchaa ñáiyu quide nándi sá cuèhé sá dúhá dàcutíí cuíta ni-hnú-yu cuèi ndècu ndihí-yu tnúhu ní chídó tnùní ndíi Moisés àdi ñá túú ndècu ndihí-yu. 13 Te nchaa ñáiyu dìcò-ni sàcúndedóho nchaa tnúhu ní cáháⁿ ndíi Moisés te ñá túú tnì-yu, ñáiyu-áⁿ ñà túú cùdiú-yu núú Yá Ndiöxí, dico nchaa ñáiyu tnì nchaa tnúhu ní cáháⁿ ndíi, ñáiyu-áⁿ càchí Yá Ndiöxí sá cùdiú-yu núú-gǎ, chi ñá túú-gǎ cuéchi-yu ndècu núú-gǎ. 14 Te nchaa ñáiyu ñá túú ndècu ndihí tnúhu ní chídó tnùní ndíi Moisés, te núu quidé-yu nchaa nàcuáa ní cáháⁿ ndíi te cùu-xi^h sá sání tnàhí iní méè-yu cadá-yu, te sá sání iní-yu-áⁿ cùú-xí^h tnúhu váha sá sánú ìchi ñaha xii-yu nàcuáa cada váha-yu cundecú-yu. 15 Te sá dúcáⁿ quidé-yu xiǎⁿ cùtnùní sá sání iní-yu dǎtná càháⁿ tnúhu ní chídó tnùní ndíi Moisés cada ñáiyu isràél, te ío váha cùtnuní iní-yu nchaa nàcuáa quidé-yu chi ndixi túu iní-yu òré ñá túú quide váha-yu. 16 Te sáá nduu te Yá Ndiöxí cúñaha-gǎ xii Xítóhó Jesucrístú

cada ndáá-gá nchaa cuéchi ñáyii, nchaa sá sání ìní mée-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nacuáa naníhí tàhú-ó, tnúhu sá dānèhé ñàhà-í xii-ndo.

Cuèndá ñáyii isràél ndìhi cuèndá nchaa tnúhu ní chídó tnùnì ndí Moisés

¹⁷ Te nchòhó ñáyii isràél nchaa-ndo cùu-ndo ndì mee-í, te càchí-ndó sã nchìcúⁿ nihnu-ndo quìde-ndo nchaa tnúhu ní cáháⁿ ndí Moisés nũu xĩãⁿ ndécú vãha-ndo, te càchí-ndó sã ïo càhnu cuu-ndo sá ndécú ndìhi-ndo Yá Ndiöxí. ¹⁸ Te cùtnuní ìní-ndó nchaa nacuáa cuìní Yã Ndiöxí cada-ndo, te sá dúcáⁿ nchìcúⁿ nihnu-ndo quìde-ndo nacuáa càháⁿ tnúhu-áⁿ xĩãⁿ cùtnuní ìní-ndó nchaa sã ïo-gá váha xìnì ñuhu-xi cada-ndo. ¹⁹ Te càchí-ndó sã ïo váha xìnì-ndó cànuichi-ndo nchaa ñáyii ñã túú cùtnuní ìní-xi, te càchí tucu-ndo sã ïo váha xìnì-ndó nà canu ichi-ndo nchaa ñáyii ndècu ichi cuehé ichi duha. ²⁰ Te sànu ichi-ndo nchaa ñáyii ío ñi ñĩquí-xi, ndìhi nchaa ñáyii vitna ta tècú tnùnì nchaa sã vãha, te ducaⁿ quìde-ndo chi ndècu ndìhi-ndo nchaa tnúhu ní chídó tnùnì ndí Moisés, te tnúhu-áⁿ cúú-xí tnúhu ndáá, chi sànu ichi ñaha-xi xii-ndo nacuáa cada-ndo. ²¹ Te nchòhó dàcuaha-ndo ñáyii nàcuáa cadá-yu, te mee-ndo ñã túú dàcuaha-ndo cada-ndo nchaa nacuáa tàú-xi cunduu, te xãhaⁿ-ndo xii-yu sã vã cúú dùhú-yu te mee-ndo dùhu-ndo. ²² Te dàcuaha-ndó-yu sã cuè téé vá cúú cãháⁿ ndìhi-güedé ñáyii ñìhí te núu ñã díú ñàdìhí-güedé cúú-yu, te ducaⁿ-ni cuè ñáyii ñìhí, vá cúú cãháⁿ ndìhí-yu téé te núu ñã díú yĩ-yu cùu-güedé. Te nchaa sã xãhaⁿ-ndo vã cúú càda ñáyii te mee-ndo quìde-ni-ndo, te xãhaⁿ-ndo xii-yu

sá vǎ cánèhé-yu sá yíñùhu núú nchàa sá càchí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te càchí-ndó sǎ ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuáa ní cáháⁿ ndíi, te sá dúcáⁿ quide-ndo-áⁿ te dàquee tíhú-ndó Yǎ Ndiǒxí. ²⁴ Te quèe ndáá-xi nàcuáa càháⁿ-xi núú tütú Yǎ Ndiǒxí nàcuáa quide-ndo-áⁿ núú càchí-xi sá ncháá ñǎyiu ñá túú cùu ñáyiu isràél càháⁿ cuèhé-yu cuèndá Yǎ Ndiǒxí sá cuèndá-ndó.

²⁵ Te nchòhó ñáyiu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcáⁿ te núu quide-ndo nchaa nacuáa ní cáháⁿ ndíi Moisés. Dico núu ñá túú quide-ndo nchaa nacuáa ní cáháⁿ ndíi ña, te ñá túú nàndíhi-xi sá cúú-ndó ñáyiu isràél cuèi ndècu seña ñii-ndo. ²⁶ Te nchaa ñáyiu ñá túú ndècu ndihí seña ñii-xi, te núu quidé-yu nchaa nàcuáa ní cáháⁿ ndíi Moisés, te cùú-yu dàtná cue ñáyiu ndècu ndihí seña ñii-xi, chi quidé-yu nchaa nàcuáa ní cáháⁿ ndíi. ²⁷ Te ñáyiu ñá túú ndècu ndihí seña ñii-xi, te núu na càdá-yu nchaa nàcuáa ní cáháⁿ ndíi Moisés, te ñáyiu-áⁿ cachí-yu sá ñà túú quide ndáá nchaa nchòhó ñáyiu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa càháⁿ tnúhu-áⁿ. ²⁸ Te nchòhó ñáyiu isràél, ñáyiu nchìcúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáyiu isràél, te mee-ndo ndècu seña ñii-ndo dico ñá túú quide-ndo nacuáa tàú-xi cada nchaa ñáyiu ndècu seña ñii-xi, te mee-ni seña-áⁿ sǎha-ndo ñii-ndo te ñá túú quide-ndo nacuáa cuèní Yǎ Ndiǒxí cada-ndo. ²⁹ Te nchaa ñáyiu sàndáá

ndisa iní-xi Yá Ndiõxí, ñáyiú-áⁿ cúú ndisá-yu ñáyiú isràél, te sa ní nduu ndoo ní nduu nine iní-yu chi Espíritú Yă Ndiõxí ducaⁿ ñi quide-xi, dico ñá díú sã sãha-yu sèñá ñí-yu dàtná ní cachí ndí Moisés. Te ñáyiú-áⁿ cúú vâha iní ñáhá Yă Ndiõxí xii-yu cuèi ñá túú càháⁿ váha tnâha ñáyiú-yu cuendá-yu.

3

¹ Te sá dúhá càháⁿ-í te ío dava ñáyiú quesàhá-yu sá ííⁿ-ní cùu ñáyiú ñá túú cùu ñáyiú isràél ndíhi nchoo ñáyiú isràél, te quesaha tùcú-yu sá ííⁿ-ní quide tucu-xi cuèi na cuãha àdi vá cuãha sèñá ñí-yu. ² Dico yúhú càchí-í sá ncháá ñáyiú isràél ío-gá cúnùú-yu, chi ío títí nùú sã vâha ní quide ñaha Yă Ndiõxí xii-yu, chi ní sãñaha-gã tnúhu-gá ndécú ndíhí-yu. ³ Te davá-yu ñá túú cuení-yu cada ndáá-yu, dico ñá díú sã xĩáⁿ te cùyica iní Yă Ndiõxí ñá túú quide ndáá-gá. ⁴ Dico ñáhá chi xini ñuhu-xi sá ncháá ñáyiú cada cuendá-yu sá Yă Ndiõxí cúú-gã Yaá quidé ndáá cuiti, te cuèi ncháá-yu na càchí-yu sá ñà túú quide ndáá-gá, dico mee-gã chi quide ndáá-ni-gá. Te núú tùtú-gá càháⁿ-xi nàcuáa ní xáhaⁿ ìíⁿ tée ní xíndecu ndéé sanaha xii-gá, te duha ní xáhaⁿ-dẽ:
Yòhó Dútú Ndiõxí, cùtnuní iní ñáyiú sá ïo ndáá càháⁿ-n,
te cùnuu nahi-ni tnúhu-n cuèi òré càchí ñáyiú sá ñà túú càháⁿ ndáá-n.
Duha ní xáhaⁿ tée ndéé sanaha-ãⁿ xii-gá càchí-xi núú tùtú-gá.

⁵ Te cuendá nchaá sá cuèhé sá dúhá quide ñáyiú, xĩáⁿ cútnuní iní-yu sá Yă Ndiõxí cúú-gã Yaá ío váha

quìde ndáá, chi mee-gă ñá túú dùcaⁿ quide-gá. Te cuëi ducaⁿ dico vá cání iní-yu sá Yă Ndiöxí ñá túú quide ndáá-gá sá dándòho ñaha-gá xií-yu na sàá nduu, te núu ducaⁿ na càni iní-yu, te sàni iní-yu dàtná sání iní cue ñáyiu ñá túú ndècu ichi-gá. ⁶ Te vá dúcáⁿ càni iní-yu, chi núu Yă Ndiöxí ñá túú quide ndáá-gá ñá, te vá cúú càda ndáá-gá nchaa cuéchi cue ñáyiu ñuyíú-a te núu ducaⁿ.

⁷ Te núu yúhú ná càni iní-í cáháⁿ-í ìⁿ tnúhu ndehnde, te sá tnùhu-áⁿ te cani tucu iní-í sá quidé càhnu-gá-í tnúhu ndáá tnúhu Yă Ndiöxí, te sá dúcáⁿ ná cáháⁿ-í te cani tucu iní-í sá vă cúú cãháⁿ Yă Ndiöxí sá ndécú cuëchi-í. ⁸ Te núu na càni tucu iní-í sá vãha-gá cada-í nchaa sá cuèhé sá dúhá cuendá Yă Ndiöxí cada-gá sá vãha, dico ñá ndáá. Te ió ñáyiu càháⁿ cuèhé cuendá-í te cãchí-yu sá díú-ní dùcaⁿ dacuaha-í ñáyiu dico ñá ndáá sá dúcáⁿ dànehé-í-yu, te ñáyiu-áⁿ nacháhu-yu tnúhu càháⁿ-yu, chi ducaⁿ tàú-xí cunduu.

Nchaa ñáyiu ñuyíú-a ndècuéchi-yu

⁹ Te vitna cãchí dava ñáyiu sá ïo-gá cúnùu nchoo cue ñáyiu isràél dàcúúxí dàva-gá ñáyiu, dico yúhú cãchí-í sá ñãhá, te sa ní cachí tnúhu ndáá-í xii-ndo sã nchaa ñáyiu ndècuéchi-yu cuëi ñáyiu isràél te cuëi ñáyiu ñá túú cùu ñáyiu isràél. ¹⁰ Te núú tütú Yă Ndiöxí cãchí-xi:

Vá yõo ìⁿ quide ndáá,

¹¹ te ni vá yõo ìⁿ tècú tnùní tnúhu váha,

te ni vá yõo ìⁿ nànducu nihnu Yă Ndiöxí.

¹² Chi nchaá-yu ñá túú nchìcúⁿ nihnú-yu ichi váha, te nchaá-yu cùú-yu ñáyiu xĩndecu neñúú sá cúú-xí Yă Ndiöxí.

Te ni ìⁿ-yu ñá túú quidé-yu ìⁿ sá vǎha.

13 Te cada iní-ndó sǎ yúhǔ-yu cùu-xi datná cúú ìⁿ yaú núú yíndǔxi ndíyí núú ìo ndehe sàháⁿ, te ducaⁿ sǎtnahá-xi cùu yuhú-yu, chi ío càháⁿ cuèhé-yu, te mee-ni dándahú-yu nchaa tnàha ñáyiú-yu.

Te cada iní-ndó sǎ vènenú cóo yíhí yùhú-yu chi mee-ni càháⁿ úhú-yu cuèndá tnàha ñáyiú-yu.

14 Te ío iní-yu càháⁿ úhú tnáhǎ-yu.

15 Te àúⁿ nǎ cuu àúⁿ nǎ xǐǎⁿ xǐsahni tnàhá-yu.

16 Te nchaa núú xícá cùú-yu quíde úhú iní-yu nchaa tnàha ñáyiú-yu nàcuáa ndìhú iní ñáyiú-áⁿ.

17 Te ñá túú cuíní-yu cundecu ndìhi tnàha váha-yu.

18 Te ñá túú sàni iní-yu canehé-yu sá yíñùhu núú Yǎ Ndiǒxí.

Duha quíde-yu càchí-xi núú tütú-gá.

19 Te cùtnuní iní-ó sǎ nchaa tnúhu ní chídó tnùní ndíi Moisés cúú-xí cuèndá nchaa ñáyiú nchìcúⁿ nihnu nchaa tnúhu-áⁿ. Te tnúhu-áⁿ cúú-xí cuèndá sá vǎ yǒo tnàhí cachí sá ñà túú cuèchi-xi, te ducaⁿ te nchaandi túhú ñáyiú cutnùní iní-yu sá ná chǎhu-yu nchaa sá quíde-yu núú Yǎ Ndiǒxí. 20 Te ducaⁿ càda-xi chi ni ìⁿ ñáyiú vá càchí-ó sǎ vǎ cùndècu cuèchi-yu núú Yǎ Ndiǒxí cuèndá-ni sá nchìcúⁿ nihnú-yu nchaa tnúhu sá ní chídó tnùní ndíi Moisés, te tnúhu-áⁿ càchí tnúhu-xi cuèndá-ni sá cùtnuní iní-ó sǎ ndécú-ó ìchi cuehé ichi duha.

Te núu na quíndáa iní-ó Xǐtohó Jesucristú te naníhí tàhú-ó

21 Te vitna ní cutnùní iní-ó sǎ ñà díú sǎ cádá-ó nchaa nacuáa ní cáháⁿ ndíi Moisés cudìu-o núú

Yă Ndiöxí, chi mee-gă quidé cùdiu-o núú-gă. Te núú tùtú ndí Moisés ndíhi núú tùtú cue téé ní xóo cáháⁿ tnúhu Yă Ndiöxí ndéé sanaha càháⁿ-xi nàcuáa cada ñaha-gă xii-o vitna. ²² Te ducaⁿ cùdiu-o núú Yă Ndiöxí te núu na quìndáá iní-ó Xítóhó Jesucristú. Te diu-ni ducaⁿ cùdiu nchaa ñáyiu ñuyíú te núu na quìndáá iní ñáhă-yu xii-gă, chi ñⁿ-ni cùu-o nchaa-o sá cúú-xí Yă Ndiöxí. ²³ Chi nchaá-yu ndècu cuéchi-yu, chi ñă ñⁿ-yu quidé-yu nàcuáa cáháⁿ Yă Ndiöxí sá cúú-yu ñáyiu quide váha. ²⁴ Dico Yă Ndiöxí ío váha iní-gă chi ní quide ñaha-gă xii-o ñⁿ sá váha, chi dícó-ni ducaⁿ ñⁿ quide-gă nàcuáa vá cùndècu-gă cuéchi-o núú-gă, chi Xítóhó Jesucristú ní sati níñí-gă te ní xíhí-gă, te ducaⁿ ñⁿ yáha-gă cuendá sá vă cùndècu-gă cuéchi-o. ²⁵ Te Yă Ndiöxí ní taxi ndecu-gă Xítóhó Jesucristú núú ñăyiu ñuyíú-a, te ní xíhí-gă sá cuendá nchaa yícá cuéchi-yu, te ducaⁿ ñⁿ cuu cuendá sá ncháá ñăyiu na quìndáá iní ñáhá xii-gă te vá náchăhu-yu cuéchi-yu núú Yă Ndiöxí. Te Yă Ndiöxí ní quide ndee iní-gă nchaa sá cuéhé sá dúhá ñⁿ quide cue ñáyiu ní xindecu ndéé sanaha. Te xíăⁿ ní xíhí Xítóhó Jesucristú cuendá cutnùní iní-ó să Yă Ndiöxí cúú-gă Yaá ío váha quide ndáá cuéi ducaⁿ ñⁿ quide ndee iní-gă nchaa sá ñⁿ quide cue ñáyiu-áⁿ. ²⁶ Núu xíăⁿ vitna ní cutnùní ndisa iní-ó să quidé ndăá-gă, te quide-gă sá cuè ñáyiu vá cùndècu-gă cuéchi-yu núú-gă, te núu na quìndáá iní-yu Xítóhó Jesucristú.

²⁷ Te vitna vá càchí-ó să ío càhnu cuu-o cuendá sá ñă túú-gă cuéchi-o ndècu núú Yă Ndiöxí, te ducaⁿ ñă túú-gă cuéchi-o ndècu núú-gă cuendá sá sàndáá iní-ó Xítóhó Jesucristú, te ñă díú să cuendá nchaa

tnúhu ní cáháⁿ ndíi Moisés. ²⁸ Te cùtnuní iní-ó sǎ nděda-ni càa ñǎyiu vá cùndècu-gǎ cuéchi-yu núú Yǎ Ndiǒxí te núu na quíndáá iní-yu Xítóhó Jesucrìstú cuèi ní quidé-yu nchaa nàcuáa ní cáháⁿ ndíi Moisés àdi ñá túú ní quidé-yu.

²⁹ Te cùtnuní iní-ó sǎ Yǎ Ndiǒxí cúú-gǎ Ndiǒxí nchaandi túhú ñǎyiu, te ñá díú mèe-ni Ndiǒxí ñǎyiu isràél cúú-gǎ. ³⁰ Te ñndìi díi-gǎ cúú-gǎ Ndiǒxí, te nchaa ñǎyiu sàndáá iní ñáhá xii Xítóhó Jesucrìstú te vá cùndècu-gǎ cuéchi-yu núú Yǎ Ndiǒxí cuèi cùú-yu ñǎyiu isràél àdi ñá túú cùú-yu. ³¹ Te ñá díú sǎ sàndáá iní-ó Xítóhó Jesucrìstú te cachí-ó sǎ ñá túú nàndíhi nchaa tnúhu sá sánú ìchi ñaha xii-o nacuáa cada-o, te ñáhá chi sá dúhá sàndáá iní-ó-gǎ te xiǎⁿ nchìcúⁿ nihnu-o quide-o nacuáa càháⁿ tnúhu-áⁿ.

4

Cuèndá ndíi Àbrahám

¹ Te vitna na càchí tnúhu-í xii-ndo cuèndá ndíi Àbrahám téé ní cuu ñaní tnáhá-ó ñí xíndecu ndéé sanaha. ² Te ndíi-áⁿ ñá túú ní xíndecu cuéchi ndíi núú Yǎ Ndiǒxí, dico ñá díú cuèndá ñⁿ chiuⁿ ní quide ndíi ducaⁿ ñá túú ní xíndecu cuéchi ndíi núú-gǎ. Chi núu cuèndá ñⁿ chiuⁿ ní quide ndíi ducaⁿ ñá túú ní xíndecu cuéchi ndíi núú Yǎ Ndiǒxí ñá, te cada càhnu ndíi mee ndíi ni cùu, dico ñá díú núú Yǎ Ndiǒxí cada càhnu ndíi mee ndíi te núu ducaⁿ ñí quide ndíi. ³ Te chí dándàcu iní nàcuáa càháⁿ-xi núú tütú Yǎ Ndiǒxí núú càchí-xi: “Té Àbrahám ní sàndáá iní-dé Yǎ Ndiǒxí, te xiǎⁿ ní cachí-gǎ sá cúú-dé núú-gǎ”, duha càchí-xi núú tütú-gǎ. ⁴ Te sá cúhúⁿ yǎhu ñⁿ téé quide chiuⁿ, te vá càchí-ó sǎ xiǎⁿ cúú-xí

ìⁿ táhú sǎ cúú-xí-dě chi yáhu tnàhí-dé cúú-xí. ⁵ Te vá yǎo ìⁿ ndàcu cada ìⁿ chiuⁿ nacuáa cudù-xi núú Yǎ Ndiǒxí. Te ñá túú nǎ chùⁿ xini ñuhu-xi cada ñáyiu te cudù-yu núú-gǎ, chi xìni ñuhu-ni-xi sá quìndáá-ni iní-yu-gá. Te diu-gá càchí-gá sá ñáyiu ndècu ichi cuehé ichi duha vá cùndècu-gá cuéchi-yu núú-gǎ, te núu na quìndáá iní ñáhǎ-yu xii-gá. ⁶ Te diu-ni ducaⁿ ñí cáháⁿ ndíi Dàvíí, chi ní cachí ndíi sá ìo váha táhú nchaa ñáyiu ní cachí Yǎ Ndiǒxí cudù núú-gǎ, dico ñá díú cuendá ìⁿ chùⁿ quidé-yu cudù-yu núú-gǎ. ⁷ Te duha ní cachí ndíi: Váha táhú nchaa ñáyiu quìde cahnu iní Yǎ Ndiǒxí nchaa cuéchi-xi, te ñá túú-gǎ quidé cuendá-gá nchaa sá cuèhé sá dúhá ñí quidé-yu.

⁸ Váha táhǔ-yu chi Yá Ndiǒxí càchí-gá sá ñà túú-gǎ cuéchi-yu.

Duha ní cachí ndíi Dàvíí.

⁹ Te ñá díú mèe-ni ñáyiu ngǔndecu sèñá ñì-xi ducaⁿ vǎha táhǔ-yu, chi tnàhá ñáyiu ñá túú ngǔndecu sèñá ñì-xi ducaⁿ vǎha táhǔ-yu. Te sa nàha-o sá Yǎ Ndiǒxí ní cachí-gá sá cúdù ndíi Àbrahám núú-gǎ cuendá sá ni sàndáá iní ñáhá ndíi xii-gá. ¹⁰ Te cunaha-ndo sǎ dǐhna-gá ní cachí Yǎ Ndiǒxí sá cúdù ndíi Àbrahám núú-gǎ te dǎtnùní ngǔndecu sèñá ñì ndíi. ¹¹ Te ní ngǔndecu sèñá ñì ndíi cuendá xǐǎⁿ cuu-xi ìⁿ sèñá sá cúdù ndíi núú Yǎ Ndiǒxí. Te ndéé cútnàhá vátá ngǔndecu-gá sèñá ñì ndíi, te sa cùdù ndíi núú-gǎ chi ní sàndáá iní ñáhá ndíi xii-gá. Te sá dúcáⁿ ñà túú ndècu sèñá ñì ndíi cútnàhá ní sàndáá iní ndíi Yá Ndiǒxí xǐǎⁿ ní

cuu ndíi dàtná ìⁿ díhí dǔtú nchaa ñáyiú sàndáá iní ñáhá xii-gá, ñáyiú ñá túú ní ngǔndecu sèñá ñii-xi, te cùdiú-yu núú-gǎ. ¹² Te ndíi Àbrahám ní cuu tucu ndíi dàtná ìⁿ díhí dǔtú nchaa ñáyiú ní ngǔndecu sèñá ñii-xi, dico ñá díú cuèndá-ni sá nǐ ngǔndecu sèñá ñii-yu cùu ndíi díhí dǔtǔ-yu, chi cuèndá sá sàndáá iní-yu Yá Ndiǒxí nchìcúⁿ nihnú-yu nàcuáa ní quide ndíi ní sàndáá iní ñáhá ndíi xii-gá ndéé cùtnàhá vátá ngǔndecu-gá sèñá ñii ndíi.

Yá Ndiǒxí cada-gá nchaa nàcuáa ní cachí-gá te núu na quíndáá iní-ó-gǎ

¹³ Te Yá Ndiǒxí ní xáhaⁿ-gǎ xii ndíi Àbrahám sá ndúú táhú ndíi cunuu ndíi ñuyíú, ndíi^h cue déhe ndíi, ndíi^h nchaa dava-gá cue ñaní tnáhá ndíi vitna cacu túu. Te ducaⁿ nǐ xáhaⁿ Yá Ndiǒxí xii ndíi ndíi^h cue ñaní tnáhá ndíi, chi ní sàndáá iní ñáhá ndíi xii-gá núu xíǎⁿ ní cudíu ndíi núú-gǎ. Te ducaⁿ nǐ xáhaⁿ-gǎ xii ndíi dico ñá díú cuèndá sá nǐ quide ndíi nàcuáa ní xáhaⁿ Yá Ndiǒxí xii ndíi Moisés cada ñáyiú ndéé cuéé-gá. ¹⁴ Te núu mee-ni ñáyiú nchìcúⁿ nihnu quide nàcuáa ní cáháⁿ ndíi Moisés ní ndúu táhǔ-yu cunúú-yu ñuyíú-a ni cùu ña, te ñá túú xini ñuhu-xi quíndáá iní-ó Yá Ndiǒxí, te ñá túú nàndíi^h tnúhu ní xáhaⁿ Yá Ndiǒxí xii ndíi Àbrahám ní cùu te núu ducaⁿ. ¹⁵ Te núu ìⁿ ñáyiú ñá túú quide nàcuáa càháⁿ tnúhu sá sánú ìchi ñaha xii-o nàcuáa cada-o te nacháhu-yu sá dúcáⁿ quidé-yu. Te núu ñá túú tǔhǔhu sá sánú ìchi ñaha-xi xii-o nàcuáa cada-o ni cùu ña, te ñá túú cuéchi-o ni cùu.

¹⁶ Te ducaⁿ nǐ xáhaⁿ Yá Ndiǒxí xii ndíi Àbrahám nàcuáa cada-gá, chi cuèndá sá ni sàndáá iní ñáhá ndíi xii-gá. Te ducaⁿ nǐ quide-gá chi ío váha

iní-gá, dico ñá díú sǎ ñⁿ chiuⁿ ni quide ndíi ducaⁿ ñí xáhaⁿ-gǎ. Te sá dúcáⁿ ñí cuu te cùu-xi ñⁿ tnúhu ndáá sá cúú-xí nchàa ñaní tnáhá ndíi, ñáyíu sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ni cuendá nchaa ñaní tnáhá ndíi nchìcúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñí cuu ndíi dàtná ñⁿ díhí dǔtú cue ñáyíu sàndáá iní ñáhá xii Yá Ndiöxí. ¹⁷ Te núú tǔtú Yá Ndiöxí càháⁿ-xi nàcuáa ní xáhaⁿ-gǎ xii ndíi, te duha ní xáhaⁿ-gǎ: “Yòhó té Àbrahám ní quide ñaha-í xii-n dàtná ñⁿ díhí dǔtú cue ñáyíu xǐndecu nihíi ñuyíú.” Duha ní xáhaⁿ Yá Ndiöxí xii ndíi, càchí-xi núú tǔtú-gá. Te Yá Ndiöxí náhá ndǎá-gá sá cádá-xí nàcuáa ní xáhaⁿ-gǎ xii ndíi Àbrahám, te ñíu-ni-gá cúú Yáá ní sàndáá iní ndíi, te ñíu-ni-gá dándòto-gá ñáyíu ní xíhí, te ñíu-ni-gá quidé tá ngǔndecu nchaa sá vǎtá cǔndècu-gá ñuyíú-a.

¹⁸ Te Yá Ndiöxí ní xáhaⁿ-gǎ xii ndíi Àbrahám sá ño cuéhé ðehe ndíi coo, te ío ní sàndáá iní ndíi nàcuáa ní xáhaⁿ-gǎ dico ñá túú ní cǔtnuní iní ndíi nása cada-gá, chi ío ní sahnu ndíi. Te cuendá sá dúcáⁿ ño ní sàndáá iní ndíi tnúhu ní xáhaⁿ-gǎ ñúu xíáⁿ ní cuu ndíi díhí dǔtú vǎi ñáyíu xǐndecu nihíi ñuyíú.

¹⁹ Te ndíi Àbrahám ñùhu ndíi ñⁿ ciendú cuía cǔtnàhá ducaⁿ ñí xáhaⁿ Yá Ndiöxí xii ndíi, te ní cǔtnùní iní ndíi sá ñà túú tàhú ndíi sá cóo ðehe ndíi ndíi ñadìhí ndíi ndíi Sǎrá, chi ndíi ndùú-yu sa ní sahnu vǐhí-yu, te cuèi ducaⁿ dico ní sàndáá-ni iní ndíi nàcuáa ní xáhaⁿ Yá Ndiöxí. ²⁰ Te ñá túú ní sàni ñⁿ sàni úú iní ndíi nàcuáa ní xáhaⁿ Yá Ndiöxí cada-gá sá cúú-xí ndíi, chi da uuⁿ-gá váha ní sàndáá iní ndíi nàcuáa

ní xáhaⁿ-gă, te ní cachí ndíi sá ïo cãhnu cuu-gă. ²¹ Te ní cutnùní ndáá iní ndíi sá Yă Ndiöxí ndácú-gă quidé-gă nchaa sá cãháⁿ-gă. ²² Te sá ni sàndáá iní ndíi nàcuáa ní cãháⁿ Yă Ndiöxí, núu xíãⁿ ní cachí-gă sá cúu ndíi ìⁿ tée ñá túú cuěchi-xi núú-gă.

²³ Te ní ngódó tnùní núú tütú Yă Ndiöxí cuendá ndíi Àbrahám sá ñí cachí-gă sá ñà túú cuěchi ndíi núú-gă, te ñá díú-ní cuendá méé ndíi ni ngódó tnùní núú tütú-gă. ²⁴ Chi tnàhá cuendá-ó nchaa-o ní ngódó tnùní núú tütú-gă. Te cãchí-gă sá ñà túú cuěchi-o núú-gă chi sàndáá iní-ó-gă, te ðiu-gă cúú-gă Yaá ní dándótó ñàha xii Xítohó Jesucristú Yaá cúú Xítohó-ó. ²⁵ Te Yá Ndiöxí ní cachí-gă sá díú Xítohó Jesucristú cuú-gă cuendá nacháhu-gă nchaa cuěchi-o. Te ní xíhí-gă te ní ndoto-gă cuendá nchaa-o vă cùndècu-gă cuěchi-o núú Yă Ndiöxí te núu na quíndáá iní-ó-gă.

5

Ío váha tnàhá ñáyiu cãchí Yă Ndiöxí sá ñà túú cuěchi-xi

¹ Te vitna, ñá túú-gă cuěchi-o ndècu núú Yă Ndiöxí chi sàndáá iní-ó Xítohó Jesucristú, te ío váha ndècu ndíhi-o Yá Ndiöxí vitna sá cuendá Xítohó Jesucristú. ² Te cuendá sá ni sàndáá iní-ó Xítohó Jesucristú xíãⁿ ðiu-gă ní quide ní ngúndecu váha-o núú Yă Ndiöxí, te ducaⁿ-ni cùndecu-o, te ío cùdíí iní-ó chi ndècu ndíhi-o tnúhu ndee ìní sá sàá nduu ngúndecu-o núú ïo váha cãa ndecu Yá Ndiöxí. ³ Te ñá díú-ní sã cuendá sá ndúú tãhú-ó cùndecu-o núú ndécú-gă cùdíí ìní-ó, chi cùdíí ìní-ó ndòho-o cuendá-gă, chi cùtnuní iní-ó sã núu na ndòho-o

cuendá-gá te cunduu càhnu-gá iní-ó, ⁴ te núu cùu-o ñáiyu ta quide cahnu-gá iní-xi te cùtnuní sá cúú-ó ñáiyu quide váha, te núu cùu-o ñáiyu quide váha te uuⁿ-gá tá ngündecu ndìhi-o tnúhu ndee iní cuáháⁿ sá cádá vǎha ñaha Yǎ Ndiǒxí xii-o. ⁵ Te núu ducaⁿ te vá ííⁿ ndùu ndixi cuéchi iní-ó sǎ ndécú ndìhi-o tnúhu ndee iní ngündecu váha-o. Te Espíritú sá nǐ taxi Yǎ Ndiǒxí ndécú ndìhi-o xiǎⁿ quidé-xí cùtnuní iní-ó sǎ ìo cùu iní ñáhá Yǎ Ndiǒxí xii-o.

⁶ Te nchoo ñà túú vǎdana ná ní ndàcu-o cada-o cuendá dàcácu nihnu-o mée-o, dico Xítóhó Jesucristú ní xíhí-gá cuendá-ó, ndìhi cuendá nchaa dava-gá ñáiyu ñá túú tnàhá tnúhu ndìhi Yǎ Ndiǒxí, te ní xíhí-gá mei ndùu taú-xi cuú-gá. ⁷ Te cudana-ni núu xíhí ííⁿ ñáiyu sá cuendá ííⁿ ñáiyu quide ndáá, te áma xíhí tucu ííⁿ-yu sá cuendá ñáiyu quide váha tnàha ñáiyu-xi. ⁸ Te Yǎ Ndiǒxí ní quide-gá sá nchóó cùtnuní iní-ó sǎ ìo cùu iní ñáhá-gǎ xii-o, chi cútnàhá ndécú-ó ìchi cuehé ichi duha te ní tendaha-gǎ Xítóhó Jesucristú ní quixi-gá ñuyíú-a ní xíhí-gá cuendá-ó. ⁹ Te sá cuendá sá nǐ xíhí Xítóhó Jesucristú xiǎⁿ ñá túú-gǎ cuéchi-o ndècu núú Yǎ Ndiǒxí, te vitna ní cutnùní ndáá iní-ó sǎ vǎ dáquíhíⁿ ñáhá-gǎ Yǎ Ndiǒxí xii-o núú ùhú núú ndàhú sá cuendá Xítóhó Jesucristú. ¹⁰ Te cútnàhá ñá túú tnàhá tnúhu-o ndìhi Yǎ Ndiǒxí ní cùu ní xíhí Xítóhó Jesucristú Yaá cúú Dǎhe-gá cuendá cuu váha iní ñáhá-gǎ xii-o, te ducaⁿ te nduu táhú-ó cùndecu-o ndìhi-gá nǐ caa nǐ quíhíⁿ cuendá sá nǐ ndoto Xítóhó Jesucristú. ¹¹ Te ndètu-o sáá nduu ngündecu-o ndìhi-gá nǐ caa nǐ quíhíⁿ, te ñá díú-ní xiǎⁿ quidé-ó chi tnàhá cúdíí iní-ó Yǎ Ndiǒxí, chi Xítóhó Jesucristú

ní quide-gá ducaⁿ cùdíí ìní-ó-gă, te ðiu-ni Xítohó Jesucrístú ní quide-gá ní nucúndecu váha-o ndìhì Yá Ndiöxí.

Nàcuáa ní quide ndíi Àdán ndìhì nàcuáa ní quide Xítohó Jesucrístú

¹² Te ndíi Àdán ñá túú ní quide ndáá ndíi núú Yá Ndiöxí ñúu xíáⁿ ní ngúndecu nchaa sá cuèhé sá dúhá ñùyíú-a, te sá cuendá nchaa sá cuèhé sá dúhá quide ñáyíu xíáⁿ xìhí-yu, te nchaá-yu xìhí-yu chi nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dàtnùnì ní ngúndecu nchaa tnúhu sá ñí chídó tnùnì ndíi Moisés nàcuáa ní xáhaⁿ Yá Ndiöxí cada ñáyíu, te nchoo cùtnunì ìní-ó sã ñúu ñá túú tnúhu sá sánú ìchi ñaha xii-o nacuéa cada-o, te ñá túú cuèchi-o sànuu. ¹⁴ Te ndéé cúnàhá ní xíndecu ndíi Àdán ní quesaha-xi xìhí ñáyíu, te ducaⁿ-ni xìhí-yu ndéé ní sáá nduu ñí xíndecu ndíi Moisés. Te ducaⁿ ñí xìhí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-áⁿ ñà túú ní sàndáá ìní ndíi nàcuáa ní xáhaⁿ Yá Ndiöxí cada ndíi. Te ndíi Àdán ní cuu ndíi ìⁿ téé cùu cahnu ní xíndecu ñuyíú-a, te sátá dúcáⁿ te ní quixi Xítohó Jesucrístú te Yáá-áⁿ ïo-gá càhnu cuu-gá.

¹⁵ Te sá ñí quide ndíi Àdán te vá càchí-ó sã ìⁿ-ní cùu-xi ndìhì sá ñí cachí Yá Ndiöxí nduu táhú-ó vìtna. Te sá ñà túú ní quide ndáá ndíi xíáⁿ nchaa ñáyíu xìhí-yu, dico Yá Ndiöxí ío váha ìní-gá chi ío váha ní quide-gá sá cúú-xí nchàa nchoo ñáyíu ndècu ñuyíú-a, chi òcò ducaⁿ ñí cachí-gá sá nánhí tàhú-ó, te ìⁿ òcò-ni téé tnàhá-dé ío váha ní quide-dé sá cúú-xí-ó, te téé-áⁿ cúú-dě Xítohó Jesucrístú. ¹⁶ Te

sá nǐ quide ñⁿdii-ni ndíi Àdán ñá túú ñⁿ-ni cuu-xi ndíhi sá nǐ quide Yá Ndiöxí sá cúú-xí-ó, chi ndíi-án ñá túú ní quide ndáá ndíi núú-gă. Te sá dúcáⁿ nǐ quide ndíi te xíăⁿ ní cuu-xi cuéchi díhna nuu nǐ quide ndíi, núu xíăⁿ ní cachí Yă Ndiöxí sá cuè ñáyiu quíhíⁿ-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gă ní quide sá cuè ñáyiu naníhí tàhú-yu dìcò-ni ducaⁿ, te ducaⁿ te vá cùndècu-gá cuéchi-yu núú-gă cuèi ío vâi cuéchi-yu. ¹⁷ Te sá dúcáⁿ ñà túú ní quide ndáá ñⁿdii-ni ndíi Àdán-áⁿ núú Yă Ndiöxí, xíăⁿ ní quide-xi xihí nchaa ñáyiu. Te sá cuendá sá nǐ quide ñⁿdii-ni Xítóhó Jesucristú xíăⁿ ío vâha ní quide ñaha Yă Ndiöxí xii ñáyiu, chi dìcò-ni ducaⁿ nǐ nduu táhũ-yu cùdiú-yu núú-gă. Te nchaa ñáyiu ducaⁿ cùdiu núú-gă nduu táhũ-yu cunúú-yu ndíhi Xítóhó Jesucristú cuendá sá nǐ quide-gá sá vâha sá cúú-xí-yu.

¹⁸ Te sá dúcáⁿ nǐ quide ndíi Àdán ñá túú ní quide ndíi nàcuáa ní xáhaⁿ Yă Ndiöxí xii ndíi ñⁿ xito, núu xíăⁿ ní cachí-gá sá ncháá ñáyiu tàú-yu nacháhu-yu nchaa cuéchi-yu, dico Xítóhó Jesucristú ní quide-gá ñⁿ sá vâha cuendá nchaa ñáyiu vá cùndècu-gá cuéchi-yu núú Yă Ndiöxí te núu na quíndáá iní ñáhã-yu xii-gá, te ducaⁿ te cundecú-yu ndíhi-gá ni caa ni quíhíⁿ. ¹⁹ Te sá ñà túú ní sàndáá iní ñⁿdii-ni ndíi Àdán nàcuáa ní xáhaⁿ Yă Ndiöxí xii ndíi, xíăⁿ ní nguínchicúⁿ nihnu nchaa ñáyiu quidé-yu nchaa sá cuèhé sá dúhá. Te ducaⁿ ñⁿdii-ni Xítóhó Jesucristú ní quide-gá nàcuáa ní xáhaⁿ Yă Ndiöxí cuendá sá Yă Ndiöxí cachí-gá sá cúdiú-yu núú-gă.

20 Te Yá Ndiöxí ní xáhaⁿ-gã xii ndíi Moisés nàcuáa cada ñáyíu, te sá cuendá tnúhu-áⁿ uuⁿ-gá ní ngüíta nchaa ñáyíu quidé-yu nchaa sá cuèhé sá dúhá, te Yá Ndiöxí uuⁿ-gá cundàhú iní ñáhá-gã xií-yu tucu. 21 Te sá cuendá nchaa cuéchi ñáyíu xíáⁿ xihí-yu, dico Yá Ndiöxí ío váha iní-gá chi díu-gá ní cachí-gá sá ncháá ñáyíu na tnàhá tnúhu ndihí ñaha xì-gá cudíú-yu núú-gã, te cundecú-yu ndihí-gá ni caa ni quíhíⁿ, te ducaⁿ chi Xítohó Jesucrístú ní quide-gá sá vâha sá cúú-xí-yu.

6

Ñáyíu ñá túú-gã ndécú ìchi cuehé ichi duha ndècú-yu cuendá Xítohó Jesucrístú

1 Te sá dúcáⁿ quide Yá Ndiöxí, te vá cání ìní-ó cànchicúⁿ nihnu-ni-o ìchi cuehé ichi duha, chi ñá díú sã cànchicúⁿ nihnu-o ìchi-áⁿ te ngóo càni ìní-ó sã ío-gá cundàhú iní ñáhá-gã xii-o. 2 Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáyíu sa ní xihí, núu xíáⁿ vá cúú-gã canchicúⁿ nihnu-o ìchi-áⁿ. 3 Te sa nàha-o sá cuendá sá ñí sandute-o quèe-xi sá tnàhá tnúhu-o ndihí Xítohó Jesucrístú. Te sá ñí sandute-o quèe tucu-xi sá cúú-ó datná ñáyíu ní xihí ndihí-gá. 4 Te ñá díú-ní sã ñí xihí-ó ndihí-gá chi quèe tucu-xi sá ñí nguíndüxi-o ndihí-gá te ní ndoto-o datná ní ndoto mee-gã ní dándótó ñàha Dútú Ndiöxí Yaá ío càhnu cuu, te ducaⁿ ñí cuu cuendá sá vâ cundècu-gá-ó datná ní xíndecu-o.

5 Te núu ìⁿ-ni cùu-o ndihí Xítohó Jesucrístú cuendá sá cúú-ó datná ñáyíu ní xihí ndihí-gá, te ndáá sá cúú-ó datná ñáyíu ní ndoto ní nguíndecu

váha dàtná ní ndoto mee-gă ní nucúndecu váha-gá. ⁶ Te nchoo nàha-o sá cúú-ó ñăyiu ío ndècu cuéchi-xi ni cùu, dico sátá ñi cuu-o dàtná ñăyiu ní xíhí dàtná ní xíhí Xítóhó Jesucrìstú núú cùrúxí, te ndéé dàvá-áⁿ ñi dáñá-ó nchàa ichi cuehé ichi duha ndècu-o ni cuu, te ñá túú-gă cúnùu sá cuèhé sá dúhá ìní-ó. ⁷ Chi nchaa ñăyiu ní xíhí ñá túú-gă ndécũ-yu ichi cuèhé ichi duha. ⁸ Te núu cùu-o datná ñăyiu ní xíhí dàtná ní xíhí Xítóhó Jesucrìstú ñá, te cùnùnì ndáá ìní-ó sà cùndècu-o ndìhi-gá ni caa ni quíhíⁿ. ⁹ Te sa nàha-o sá Xítóhó Jesucrìstú ní xíhí-gá te ní ndoto-gá te vá ííⁿ ndùu ííⁿ quíú-gă te cuú-gá, chi ñá túú ñăgá sá cádá cùú-gá. ¹⁰ Te Xítóhó Jesucrìstú ní xíhí-gá ííⁿ xito-ni sá cuèndá nchaa cuéchi nchoo ñăyiu ñuyíú, te vá ííⁿ ndùu-gá cuú-gá, te ndècu-ni-gá sá cúú-xí Yă Ndiöxí. ¹¹ Núu xíáⁿ nchòhó cada ìní-ndó sã dàtná sá ñi xíhí-ndó vã cùndècu-gá-ndó sã cúú-xí ìchi cuehé ichi duha, chi ndècu-ná-ndó sã cúú-xí Yă Ndiöxí, chi ní tnahá tnúhu-ndo ndìhi Xítóhó Jesucrìstú Yaá cúú Xítóhó-ó.

¹² Te núu xíáⁿ vá dáñá-gă-ndó cùnùu ni ííⁿ sá cuèhé sá dúhá ìní-ndó cuèndá sá vã cádá-gă-ndó ñi ííⁿ sá cuèhé sá dúhá sàni ìní-ndó. ¹³ Te vá dáñá-ndó tàxi tnuní ñáhá ñi ííⁿ sá cuèhé sá dúhá-áⁿ xii-ndo cuèndá sá vã cádá-gă-ndó, te chí dáñá ná tàxi tnuní ñáhá Yă Ndiöxí xii-ndo, te chí dáñá ná chindee ñaha-gá cada-ndo mèe-ni sá vãha, te ducaⁿ te cada ìní-ndó sã cúú-ndó dàtná ñăyiu ní xíhí te ní ndoto ndècu. ¹⁴ Te ducaⁿ càda-ndo chi vá ndácú-gă ni ííⁿ sá cuèhé sá dúhá tàxi tnuní ñáhá-xí xii-ndo, chi Yă Ndiöxí cùndàhú ìní ñáhá-gă chíndèe ñaha-gá xii-ndo. Te ducaⁿ chi ñá túú-gă cúnùu nchaa tnúhu sá ñi chídó tnùnì ndí Moisés cada ñăyiu.

Ñáyiú nchìcúⁿ nihnu sá vǎha

¹⁵ Te ñá díú sǎ cùndàhú iní ñáhá Yǎ Ndiǒxí xii-o chìndee ñaha-gǎ ndihí sá ñà túú-gǎ cùnùu nchaa tnúhu ní chídó tnùní ndíi Moisés, te cachí-ó sǎ cúú-ní cùndecu-o ichi cuehé ichi duha. ¹⁶ Te nchoo xìní-ó sǎ nùu na cuǎha-o tnúhu cunu cuechi-o nùú ìⁿ ñáyiú cuìní cunu cuechi-o nùú-xi, te cùu-ná-ó ñáyiú xìnu cuechi nùú-yu te quìde-o nchaa chiuⁿ tahú-yu. Te ducaⁿ sǎtnahá-xi cùu nchaa ñáyiú quìde nchaa sá cuèhé sá dúhá chi tàxi tnuní ñáhá-nǎ-xi xií-yu, te ñu nchaa xiǎⁿ dácuíta nihnu ñaha-xi xií-yu, te ñu-ni ducaⁿ sǎtnahá-xi cùu nchaa ñáyiú sàndáá iní ñáhá xii Yá Ndiǒxí chi tàxi tnuní ñáhá-gǎ xií-yu, te quìdé-yu nchaa sá vǎha nàcuáa cuìní méé-gǎ cadá-yu. ¹⁷ Te nchòhó ducaⁿ nǐ xóo cada-ndo nchàa sá cuèhé sá dúhá ní cùu, dícó táxǎhu xii Yá Ndiǒxí chi vitna nǐ yùhu nǐ iní-ndó quìde-ndo nchaa nacuáa càháⁿ tnúhu-gǎ sá nǐ ngúndecu ndihí-ndo. ¹⁸ Te vitna ñá túú-gǎ táxi tnùní ñáhá nǐ ìⁿ sá cuèhé sá dúhá xii-ndo, te quìde-ná-ndó nchàa sá vǎha tàuchiuⁿ Yá Ndiǒxí cada-ndo. ¹⁹ Te duha càháⁿ-í cuèndá cue ñáyiú xìnu cuechi cuendá sá nchòhó tecú tnùní-ndó nàcuáa ndùu tnúhu càháⁿ-í. Te nchòhó ní dáñá-ndó nǐ taxi tnùní ñáhá nchàa sá cuèhé sá dúhá xii-ndo, te ñá túú ní quìde-ndo nacuáa ní cáháⁿ Yá Ndiǒxí cada-ndo chí da vìhi-gǎ ní quìde-ndo, te ñu-ni ducaⁿ chí dáñá ná tàxi tnuní ñáhá Yá Ndiǒxí xii-ndo vitna cuendá cada-ndo mèe-ni sá vǎha nàcuáa cuìní méé-gǎ cada-ndo, te ducaⁿ te cuu-ndo ñáyiú quìde ndáá cundecu núú-gǎ.

²⁰ Te nchoo cǔtnàhá ní xóo cada-o nchàa sá cuèhé sá dúhá ñà túú ní xóo cada-o nǐ ìⁿ sá vǎha cuìní Yá Ndiǒxí cada-o. ²¹ Te dícó sácáⁿ nùú sǎñaha nchàa

sá cuèhé sá dúhá-ǎⁿ te núu na càda-o, te ni ìⁿ sá vǎha vá nihí-ó te núu na càda-o nchaa xíǎⁿ, te ðiu nchaa xíǎⁿ dácuíta nihnu ñaha-xi xì-o. ²² Te vitna ñá túú-gǎ cúú-ó ñǎyiu ndècu ichi cuehé ichi duha, chi cùu-ná-ó ñǎyiu quède nchaa nacuáa càháⁿ Yǎ Ndiǒxí. Te sá dúhá quède-o cuu ndisa-xi ìⁿ sá vǎha sá cúú-xí-ó, te cùu-o ñáyiu quède ndáá ndécú-ó nǔú-gǎ vitna, te sáá nduu cùndecu-o ndìhi-gá ni caa ni quíhíⁿ. ²³ Te nchaa sá cuèhé sá dúhá ðicó dácuíta nihnu ñaha-xi xì-o, ðico Yá Ndiǒxí ní quide-gá sá ðicó-ni ducaⁿ ndùu táhú-ó cùndecu-o ndìhi-gá ni caa ni quíhíⁿ, chi ní tnahá tnúhu-o ndìhi Xítóhó Jesucristú Yáá cúú Xítóhó-ó.

7

Cuèndá ñáyiu tnǎndaha

¹ Te nchaa nchòhó ñáyiu ndècu ndìhi-í ichi Xítóhó Jesucristú sa nàha-ndo nacuáa càháⁿ tnúhu sá dánèhé ñáhá xì-o nacuáa cada-o cùndecu-o, chi tnúhu-án càháⁿ-xi dóho nchaa ñáyiu xǐndecu vǐvú ñuyíú-a. ² Te nchaa ñáyiu ðìhí sa ndècu yí-xi, te ðiu tnúhu-án dánèhé ñáhá-xí xì-yu sá vǎ dáñǎ-yu yí-yu, ðico núu na cùú yí-yu te ñá túú-gǎ ná càháⁿ tnúhu-án cuèndá-yu. ³ Dico núu vátá cúú-gá yí-yu te ñá túú ndùu váha-xi naquehéⁿ-yu ingá téé, ðico núu na cùú yí-yu te quendóo mèé-yu, te ñá túú nǎgá càháⁿ tnúhu sá dánèhé ñáhá xì-yu nàcuáa cadá-yu te ducaⁿ te cuu naquehéⁿ-yu ingá téé, te ñá túú cùu-xi ìⁿ cuéchi.

⁴ Te nchòhó cue ñáyiu ndècu ndìhi-í ichi Xítóhó Jesucristú cúú-ndó dàtná ñáyiu ní xíhí dàtná ní xíhí-gá. Te xíǎⁿ ñá túú-gǎ táxí tnùnì ñáhá nchàa

tnúhu ní chídó tnùní ndíi Moisés xii-ndo. Te ducaⁿ ñí cuu cuendá nchòhó ngúndecu-ndo ndìhi Xítóhó Jesucristú Yaá ní xíhí ní cùu te ní ndoto-gá. Te ducaⁿ ñí cuu cuendá nchaa nchoo ñáyiú ndècu ichi-gá cada-o nchàa nacuáa càháⁿ Yă Ndiöxí. ⁵ Te nchoo ñí xíndecu-o ìchi cuehé ichi duha, te tnúhu sá sánú ìchi ñaha xii-o nacuáa cada-o cùndecu-o cachí-xi sá ñà túú vâha cundecu-o ìchi-áⁿ, te nchoo dà uuⁿ-gá ní quide-o nchàa sá cuèhé sá dúhá sá dúcáⁿ càháⁿ tnúhu-áⁿ, te sá dúcáⁿ ñí quide-o te ta xíta nihnu-o cuáháⁿ ní cùu. ⁶ Te vitna cada iní-ó sá cúú-ó dàtná ñáyiú ní xíhí sá cúú-xí tnúhu sá dánèhé ñáhá xii-o nacuáa cada-o cùndecu-o, chi ñá túú-gă cúnú-xi, te vitna mee-ñă Espíritú Yă Ndiöxí chíndèe ñaha-xi xii-o xinu cuechi-o núú-gă, te ñá díú cuendá nchaa tnúhu sá ñí ngúndéé ndéé díhna cada ñáyiú xínu cuechi-o núú-gă vitna.

Nchaa sá cuèhé sá dúhá ñúhu iní-í

⁷ Te cuèi duha càháⁿ-í dico vá cúú tnàhí càháⁿ-ó sá tnúhu sá sánú ìchi ñaha xii-o nacuáa cada-o cùndecu-o ñá díú tnúhu váha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnúhu-áⁿ ní càchí tnúhu-xi xii-í, te ni ñà túú cùtnuní tucu iní-í núu váha àdi ñá túú vâha sá nchídó iní-í sá ndécú ndìhi tnaha ñáyiú-o ni cùu te núu ñá túú tnúhu-áⁿ ní càchí-xi sá vâ cúú cùu iní-í sá ndécú ndìhí-yu. ⁸ Te tnúhu-áⁿ ñí dánèhé ñáhá-xí xii-í sá vâ cúú càda-í ni ñá sá cuèhé sá dúhá, dico sá cuendá tnúhu-áⁿ uuⁿ-gá ducaⁿ ñí sani iní-í ní quide-í. Te núu ñá túú tnúhu sá sánú ìchi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cútnàhá vátá ñihí-gá-í tnúhu-áⁿ te ñá

túú tnàhí ná sání ìní-í ndécù-í ni cùu, dico sátá nì níhì-í tnúhu-áⁿ te ní cutnùnì ìní-í sá ndécú cuěchi-í, te ta xíta nihnu-í cuáháⁿ ní cùu. ¹⁰ Te núu ni quide-í nchaa nàcuáa càháⁿ tnúhu-áⁿ te sa ndéé ama-gá naníhí tàhú-í ní cùu, dico ñá túú ní quide-í núu ní cutnùnì ìní-í sá tá xíta nihnu-í cuáháⁿ ní cùu. ¹¹ Te sá xíí tnúhu-áⁿ xíáⁿ uuⁿ-gá ní cunuu nchaa sá cuèhé sá dúhá nǐ dándàhú ñáhá-xí xì-í te ní quide-í, te ta dàcuíta nihnu ñaha-xi xì-í cuáháⁿ ní cùu.

¹² Te tnúhu sá sánú ìchi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yá Ndiõxí, te ìⁿ ìⁿ tnúhu-áⁿ cúú-xí mèe-ni tnúhu váha, te ni ìⁿ tnúhu cuèhé tnúhu duha ñá túú ñùhu tnahá. ¹³ Te vá cúú càchí-í sá tnúhu váha-áⁿ nǐ quide-xi ta xíta nihnu-í cuáháⁿ ní cùu, chi nchaa sá cuèhé sá dúhá nǐ quide-í, xíáⁿ tá dàcuíta nihnu ñaha-xi xì-í cuáháⁿ ní cùu, te sá cuendá tnúhu váha-áⁿ nǐ cutnùnì ìní-í sá quidè-í nchaa sá cuèhé sá dúhá, te xíáⁿ tá xíta nihnu-í cuáháⁿ ní cùu. Te sá cuendá nchaa nàcuáa càháⁿ tnúhu sá sánú ìchi ñaha xii-o nacuáa cada-o cùndecu-o ní cutnùnì ìní-í sá xidó ndécú cuěchi-í ní cùu.

¹⁴ Te tnúhu-áⁿ nǐ taxi Espiritú Yá Ndiõxí ndécú ndìhi-o cachí tnúhu-xi nàcuáa cada váha-o. Te nchoo cùu-o mee-ni ñáyiú yíca cuěchi, te tàxi tnuní ñáhá nchaa sá cuèhé sá dúhá xii-o ni cuu. ¹⁵ Dico nchoo tnàhá ìní-ó càda-o nchaa sá vaha dico ñá túú quide-o, te da nchaa sá ñá túú tnàhá ìní-ó càda-o quide-o, te ñá túú cùtnunì ìní-ó nǎ cuendá ducaⁿ quide-o. ¹⁶ Te sá dúcáⁿ quide-o nchaa sá ñá túú tnàhá ìní-ó, te xíáⁿ ndíxí túu ìní-ó sǎ tnúhu sá dúcáⁿ sànu ichi ñaha xii-o nacuáa cada-o cùndecu-o cuu-xi tnúhu ío váha. ¹⁷ Te cùtnunì ìní-ó sǎ nchaa sá cuèhé sá dúhá ñùhu ìní-ó, xíáⁿ quidé-xí dùcaⁿ quide-o sá ñá túú vaha, te ñá díú sǎ cáhú ìní méé-ó

dùcaⁿ quide-o. ¹⁸ Te cùu-o cue ñáyiú sàni cuehé sání dùha iní-xi, te cuiní-ó càda-o nchaa sá vãha dico ñá túú ñihí ndéé-ó càda-o. ¹⁹ Te cuiní-ó càda-o nchaa sá vãha dico ñá ndácú-ó, te ñá túú cuiní-ó càda-o datná quidé nchaa ñáyiú ndècu ichi cuehé ichi duha, chi ñáyiú-áⁿ mee-ni nchaa sá cuèhé sá dúhá quidé-yu, dico ñu-ni nchaa xíⁿ quidé-ó tnàhá-ó. ²⁰ Te sá dúcáⁿ quide-o nchaa sá ñá túú tnàhá iní-ó càda-o te ñá ñíú mèe-o ducaⁿ cahu iní-ó quide-o, chi nchaa sá cuèhé sá dúhá ñùhu iní-ó xíⁿ quidé-xí dùcaⁿ quide-o.

²¹ Te ducaⁿ tnàhí yáha-o òré cuiní-ó càda-o sá vãha, chi da mee-ni nchaa sá cuèhé sá dúhá quide-o. ²² Te ío cùdí^í iní-ó càda-o nchaa nacuáa càháⁿ Yã Ndiõxí, ²³ te ñicó-ni sá ncháá sã cuèhé sá dúhá ñùhu iní-ó, xíⁿ quidé-xí ngàni ñaha-xi xii-o ñá túú quide-o sá vãha sàni iní-ó càda-o, te ducaⁿ yãha-o chi nchaa sá cuèhé sá dúhá-ãⁿ cùnùu-xi taxi tnuní ñáhá-xí xii-o.

²⁴ ¡Te ndàhú ní cuu nchoo! Chi vá yõo ñⁿ ni ndàcu cada nacuáa vá táxí tnùní ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxãhu xii Yã Ndiõxí sá Xítohó Jesucristú ní quide-gá cuendá sá vã táxí tnùní ñáhá-gã ni ñⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó càda-o nchaa nacuáa càháⁿ Yã Ndiõxí, dico núu nchaa sá cuèhé sá dúhá ná cùnùu-xi taxi tnuní ñáhá-xí xii-o, te ñu-ni nchaa xíⁿ cada-o.

8

Ñáyiú quide nchaa nacuáa càháⁿ Espíritú Yã Ndiõxí

¹ Te vitna nchaa nchoo ñǎyiu tnàhá tnúhu ndihi Xítohá Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ichi duha, chi mee-nǎ nchaa nàcuáa càháⁿ Espíritú Yǎ Ndiǒxí quidé-ó. ² Te Espíritú Yǎ Ndiǒxí-ǎⁿ táxí tnùní ñáhá-xí xì-o, te ducaⁿ chi ndècu ndihi-o Xítohá Jesucristú, te sá dúcáⁿ tàxi tnùní ñáhá Espíritú-gá xii-o núu xǎⁿ ñá túú-gǎ táxí tnùní ñáhá nì ìⁿ-gǎ sá cuèhé sá dúhá xì-o, te ducaⁿ quide Espíritú-gá cuendá sá vǎ cuíta nihnu-o, te ñiu-ni Espíritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhíⁿ. ³ Te nchoo ñǎ ní ndàcu-o cada-o nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o, núu xǎⁿ tnúhu-ǎⁿ ñà túú ní níhí ndéé-xí càda-xi cuendá sá nchóó vǎ cuíta nihnu-o. Dico Yǎ Ndiǒxí ní tendaha-gǎ Déhe mee-gǎ ní quixi ñuyíú-a, te Yaá-áⁿ cúú-gǎ ìⁿ ñáyiu, te càa-gǎ dàtná cáá ñǎyiu ndècu cuéchi-xi xǐndecu ñuyíú-a, te sá cuendá nchaa cuéchi nchaa nchoo ñǎyiu xǐndecu ñuyíú-a ní quixi-gǎ, te ndéé dàvá-áⁿ nǐ quide-gǎ cuendá sá vǎ táxí tnùní ñáhá-gǎ ni ìⁿ sá cuèhé sá dúhá xì-o. ⁴ Te ducaⁿ nǐ quide-gǎ cuendá nchoo nchìcúⁿ nihnu-o quide-o nacuáa càháⁿ tnúhu sá sánú ìchi ñaha xii-o nacuáa cada-o, chi ñá túú-gǎ cùnùu ni ìⁿ sá cuèhé sá dúhá ìní-ó, chi Espíritú Yǎ Ndiǒxí-ñǎ táxí tnùní ñáhá-xí xì-o.

⁵ Te nchaa ñáyiu cùnùu nchaa sá cuèhé sá dúhá ìní-xi mee-ni xǎⁿ ñúhú ìní-yu te quidé-yu. Dico nchoo ñǎyiu quide nchaa nacuáa cuíní Espíritú Yǎ Ndiǒxí ñúhú ìní-ó mèe-ni nacuáa càháⁿ Espíritú-gá-áⁿ te quide-o. ⁶ Te núu mee-ni nchàa sá cuèhé sá dúhá cùnùu ìní-ó, te cuíta nihnu-o, dico núu mee-ni nchàa tnúhu càháⁿ Espíritú Yǎ Ndiǒxí

cúnùu iní-ó, te ío váha cuu iní-ó cùndecu-o ndihí-gá ni caa ni quíhíⁿ. ⁷ Te nchaa ñáyiú ñùhu iní mee-ni sǎ cuèhé sá dúhá cùu úhú iní-yu Yá Ndiöxí, te ñá túú cuíní-yu cadá-yu nàcuáa càháⁿ-gá, te ni ñá ndácü-yu cadá-yu. ⁸ Te nchaa ñáyiú ducaⁿ cùnùu nchaa sá cuèhé sá dúhá ìní-xi-áⁿ ñà túú cùdiú-yu núú Yá Ndiöxí.

⁹ Te nchòhó chi ñá túú-gǎ cúnùu sá cuèhé sá dúhá ìní-ndó, chi mee-nǎ nàcuáa càháⁿ Espíritú Yá Ndiöxí quidé-ndó, te ducaⁿ quide-ndo chi ndècu ndihí-ndo Espíritú-gá, te diu-ni Espíritú-gá-áⁿ ñí tendaha Xítóhó Jesucrìstú véxi ndècu ndihí-o, te nchaa ñáyiú ñá túú ndècu ndihí Espíritú sá ñí tendaha Xítóhó Jesucrìstú véxi ndècu ndihí-o ñá túú ndècu ndihí ñahá-yu xii-gá. ¹⁰ Te núu ndècu ndihí-ndo Xítóhó Jesucrìstú, te cuèi na cùu yiqui cùñú-ndó sǎ cuèndá nchaa sá cuèhé sá dúhá ío ñuyíú-a, dico iní-ndó chi cundecu ndihí-xi Yá Ndiöxí chi ñá túú-gǎ cuéchi-ndo ndècu núú-gǎ.

¹¹ Te núu ndècu ndihí-ndo Espíritú Yá Ndiöxí Yaá ní dándótó ñàha xii Xítóhó Jesucrìstú, te diu-ni-gá cada te ndoto yiqui cùñú-ndó sǎ tá xíta nihnu cuáháⁿ nùu na cùu-xi, te ducaⁿ chi ndècu ndihí-ndo Espíritú-gá.

¹² Te nchòhó ñáyiú ndècu ndihí-í ichi Xítóhó Jesucrìstú, ñá túú-gǎ tàù-ndó cùnùu ni ìⁿ sá cuèhé sá dúhá ìní-ndó nàcuáa vá cùndecu-gá-ndó ìchi cuehé ichi duha. ¹³ Chi núu na cùnùu sá cuèhé sá dúhá ìní-ndó te cuíta nihnu-ndo, chi quíhíⁿ-ndó núú ùhú núú ndàhú. Dico núu dañá-ndo mée-ndo chindee ñaha Espíritú Yá Ndiöxí xii-ndo cuèndá sá vǎ cúnùu-gá sá cuèhé sá dúhá ìní-ndó ñá, te nduu táhú-ndó cùndecu-ndo ndihí-gá ni caa ni quíhíⁿ te

núu ducaⁿ na càda-ndo.

14 Chi nchaa ñáyiú quède nchaa nacuaáa sànu ichi ñaha Espiritú Yá Ndiöxí cúu-yu déhe-gá. 15 Te Espiritú sá ñi taxi Yá Ndiöxí ndécú ndìhi-o ñá túú quède-xi sá nchóó yùhú-ó cùnu cuechi-o núú-gă, chi Espiritú-áⁿ quidé-xí sã nchóó cùu-o déhe-gá, te diu-ni Espiritú-áⁿ quidé xãhaⁿ-o xii Yá Ndiöxí: “ÿòhó Dútú Ndiöxí cúu-n Tătă méé-ndí!”, duha xãhaⁿ-o xii-gá. 16 Te diu-ni Espiritú-gá-ãⁿ tnàhá tnúhu-xi ndìhi iní-ó, te càháⁿ ndáá-xi sá nchóó cùu-o déhe-gá. 17 Te sá dúcáⁿ cùu-o déhe Yá Ndiöxí xíãⁿ ní cachí-gá sá tnàhá-ó ndùu táhú-ó sã ñi nduu táhú Xitohó Jesucristú, te ducaⁿ ndùu táhú-ó te núu na càda ndee iní-ó ndòho-o datná ní ndoho Xitohó Jesucristú, te núu ducaⁿ te ío cuu càhnu-o ndìhi-gá ni caa ni quíhíⁿ.

18 Te yúhú càchí-í sá ñà túú nã cada-xi cuèi ndòho-o cuendá-gá ndécú-ó ñùyíú-a, chi ío váha càa núú ndúú táhú-ó cùndecu-o na saá nduu. 19 Te nchaandi túhú sá ñi cadúha Yá Ndiöxí ní taxi ndecu-gá ñùyíú-a ndetu cahnu-ná-xi saá nduu càchí-gá sá ïo càhnu cuu nchaa déhe-gá. 20 Te nchaa sá ñi cadúha Yá Ndiöxí ní taxi ndecu-gá ñùyíú-a ní saá nduu ñà túú-gă cúú-xí sã vãha sá cúú-xí-gă. Te ñá díú mèe sá ñi taxi ndecu Yá Ndiöxí ñùyíú-a ducaⁿ ni sàni iní-xi cunduu, chi mee-gă ducaⁿ tnàhí ní cachí-gá cunduu sá sàá nduu vã cúú-xí sã vãha sá cúú-xí-gă, dico saá tucu nduu te nchaa xíãⁿ cuu tucu-xi sá vãha sá cúú-xí-gă. 21 Te nchaa sá ñi taxi ndecu-gá ñùyíú-a vá cùndùu-gá-xi dàtná cáá-xí vïtna te ni vã dánàa-gá, chi nduu saa-xi te ngúndecu váha-xi dàtná ngúndecu váha

nchaa cue déhe-gá. ²² Te nàha-o sá ncháándì tùhú sá nchító nǐ cadúha Yá Ndiǒxí ndécú ñùyíú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi. ²³ Te ñá díú-ní nchàa sá dúcáⁿ nǐ cadúha-gá-ǎⁿ ducaⁿ ndòho-xi, chi tnahá nchoo dùcaⁿ ndoho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiǒxí Espíritú sá nǐ cachí méé-gǎ nduu táhú-ó díhnanuu. Te ío ndòho tnahá-ó ndecu-o ñuyíú-a te ndètu cahnu-ná-ó sǎá nduu ndàda saa-gá yiqui cùñú-ó, te cǎháⁿ-gá sá cúú-ó dèhe-gá. ²⁴ Te Yá Ndiǒxí ní quide-gá ní naníhí tàhú-ó nǔu xǎⁿ ní ngúndecu ndihí-o tñuhu ndee ìní ndétú-ó sǎá nduu càda-gá nàcuáa ní cachí-gá, te núu sa ndècu ndihí-o sá ndúú táhú-ó te vá cúú cǎháⁿ-ó sǎ cùndètu-o sá ndúú táhú-ó chi sa ndècu ndihí-o. ²⁵ Dico sá ndétú-ó ndùu táhú-ó cùu-xi sá vǎtá cùndècu ndihí-gá-ó, te xìni ñuhu-ni-xi cada ndee-ni iní-ó cùndetu-o ndéé sǎá nduu ndùu táhú-ó sǎ dúcáⁿ nǐ cachí Yá Ndiǒxí nduu táhú-ó.

²⁶ Te Espíritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xìní-ó cǎháⁿ ndihí-o Yá Ndiǒxí nàcuáa tàú-xi cunduu dico Espíritú-gá cǎháⁿ ndàhú-xi núú-gǎ cuèndá-ó cuèi òré ñá ñihí-ó tñuhu cǎháⁿ-ó cuèndá nchaa sá ìo cuìní-ó cǎcáⁿ-ó nǔú-gǎ. ²⁷ Te Yá Ndiǒxí sa nàha ndáá-gá nchaa nàcuáa sàni iní-ó, te ducaⁿ sà naha ndáá-gá nchaa nàcuáa sàni iní Espíritú-gá. Te Espíritú-gá cǎháⁿ ndàhú-xi núú-gǎ cuèndá nchoo ñǎyiu yìndaha-gá, te cǎháⁿ ndàhú-xi núú-gǎ nàcuáa cuìní méé-gǎ cunduu.

Nchaa sá ná càda ñàha ñǎyiu te vá ndácǔ-yu nàdatùhú-yu iní-ó chi ndacu nahí-ni-o yǎha-o nchàa sá ná cáda ñàhá-yu

28 Te sa nàha-o sá Yă Ndiǒxí quidé-gă sá ncháá sǎ yăha-o ndècu-o ñuyíú-a cùu-xí sá vǎha sá cúú-xí nchòo cue ñáyiú cùu iní ñáhá xii-gá, chi cùu-o ñáyiú ní cáháⁿ-gá cundecu ndihí-gá dàtná ní cachí iní mée-gă. 29 Te ndéé cùtnàhá vátá ngǎva-gá ñuyíú, te Yă Ndiǒxí sa nàha-gá nándi cùu ñáyiú cundecu ndihí-gá, te diu-ni ndéé dàvá-áⁿ ñí cachí-gá sá ñáyiú-áⁿ cunduu váha iní-yu dàtná váha iní Déhe mee-gă, te ducaⁿ ñí cachí-gá cuendá sá Déhe mee-gă-áⁿ cunuu-gă núú ncháa ñáyiú cundecu ndihí-gá. 30 Te nchaa ñáyiú ducaⁿ ñí cachí-gá cundecu ndihí-gá ndéé cùtnàhá vátá ngǎva-gá ñuyíú càháⁿ ñáhá-gă xii-yu vitna, te nchaa ñáyiú ducaⁿ càháⁿ-gá càchí-gá sá ñà túú-gă cuéchi-yu ndècu núú-gă, te diu-ni ñáyiú-áⁿ cachí-gá sá ïo càhnu cuú-yu.

31 Te vitna ní cutnùní iní-ó, te ñà túú nǎgá cani iní-ó, chi Yă Ndiǒxí ndécú ndihí ñaha-gá xii-o, te vá yǒo ìⁿ-gá ndacu quehdé nihnu cuendá sá vǎ chindèe ñaha-gá xii-o. 32 Te Yă Ndiǒxí ñà túú ní cùdí iní-gá Déhe-gá sá cùú-gá cuendá nchaa nchoo ñáyiú xĩndecu ñuyíú-a, te sá dúcáⁿ ndéé Déhe-gá ñà túú ní cùdí iní-gá xǎⁿ cùtnùní iní-ó sǎ táxí-gă nchaandi túhú sá xíní ñùhu-o. 33 Te vá yǒo ìⁿ ndacu cacáⁿ cuéchi núú Yă Ndiǒxí cuendá nchaa ñáyiú ní cachí-gá cundecu ndihí-gá te núu ná cúú cuéchi-yu ndècu. Chi mee-gă càchí-gá sá ñà túú ndècu cuéchi-yu núú-gă. 34 Te vá yǒo ìⁿ ndacu daquìhíⁿ ñáhá xii-o núú ùhú núú ndàhú, chi Xítóhó Jesucristú ní xíhí-gá te ní ndoto-gá, te cuándaa-gá núú ndécú Dǔtú Ndiǒxí núcǒo-gá xio cùha-gá, te ducaⁿ ïo cùnuu-gá, te yàcáⁿ càháⁿ ndàhú-gá núú

Dútú Ndiöxí cuendá-ó. ³⁵ Te vá yõo ìⁿ ndacu cada ñaha xii-o ìⁿ sá ñà túú vãha cuendá sá vã cúú ìní ñáhá-gã Xítóhó Jesucrístú xii-o, te ni tnúndòho tnúhu ndàhú, te ni sá ndìhú ìní-ó ñã cútnùní ìní-ó nãsa cada-o cãcu nihnu-o ìⁿ sá ná yãha-o, te ni nchàa sá cáda ñàha ñáyiu sá cuendá-gá, te cuëi-ni sá vã ñihí-ó sã cóhó sã cáxí-ó, te cuëi-ni sá vã ñihí-ó dõó cuihnu-o, te cuëi ndècu-ná-ó sã yãha-o ìⁿ sá yãha-o, te cuëi sa ndècu-ná-ó sã cáhni ñáhá-yu, dico Xítóhó Jesucrístú vá dáñá ndèe-gá sá cúú ìní ñáhá-gã xii-o. ³⁶ Te quee ndáá-xi nàcuáa ní cáháⁿ ìⁿ téé ní xóo cáháⁿ tnúhu Yá Ndiöxí ndéé sanaha ñí ngódó tnùní núú tütú-gá núú càchí-xi:

Yòhó Dútú Ndiöxí nchaa-ni nduu nchaa-ni òré cuíni ñáyiu cahni ñáhá-yu xii-ndí sá cuendá-n,

te càchí-yu sá cúú-ndí dàtná cue mbéé cue quiti sa ndècu túha-ná cahni-yu.

Duha ní cachí téé ní xóo cáháⁿ tnúhu-gá-án, te ducaⁿ ñí ngódó tnùní núú tütú-gá. ³⁷ Te cuëi ducaⁿ nãndi sá ná càda ñáhá-yu xii-o, dico vá ndácũ-yu na-datùhú-yu ìní-ó chi ndacu nahi-ni-o yãha-o nchàa sá dúcáⁿ ná càda ñáhá-yu xii-o, te ducaⁿ chi Xítóhó Jesucrístú Yaá ío cùu ìní ñáhá xii-o ndecu ndìhi ñaha-gá chíndèe ñaha-gá. ³⁸⁻³⁹ Te yúhú cútnùní ndáá ìní-í sá ñí ìⁿ sá ìò ñuyíú-a vá ndácú-xí càda-xi cuendá sá vã cúú ìní ñáhá-gã Yá Ndiöxí xii-o, te ni sã cùú-ó, te ni sã cúndècu-o ñuyíú-a, te ni ìⁿ espíritú sá ìo cùnuu cundìhi yucu ñávãha te ni ìⁿ dava-gá cue espíritú cúndìhi-xi vá ndácú-xí càda-xi cuendá sá vã cúú ìní ñáhá Yá Ndiöxí xii-o. Te ni sã cúú ñuyíú-a vitna, te ni sã cúú ndéé cuèé-gá, te ni ìⁿ

sá ndécú àndiu, te ni ìⁿ sá ndécú ñùyíú-a, te ni ìⁿ sá ñ cadúha mee Yă Ndiöxí, ni ìⁿ xíăⁿ vá ndácú-xí cãda-xi cuendá sá vă cúú iní ñáhá-gă xii-o chi ndècu ndihí-o Xítóhó Jesucrìstú Yaá cúú Xítóhó-ó.

9

Yá Ndiöxí ní cachí-gá sá ñăyiu isràél cuú-yu ñăyiu canchicúⁿ nihnu ñaha xii-gá

¹ Te yúhú cãháⁿ ndáá-í chi cùu-í ìⁿ téé ndècu ndihí Xítóhó Jesucrìstú, te ndècu ndihí-í Espíritú Yă Ndiöxí nũu xíăⁿ cútnùní iní-í sá cãháⁿ ndáá-í. ² Te nchaa-ni nduu nchaa-ni òré ío ndihú iní-í, te ducaⁿ-ni ïo quide úhú-xi iní-í ³ sá cuendá nchaa ñăyiu cùu ndi mee-í. Te núu dìcò cúú-xí ìⁿ sá chíndèè ñaha xii-yu nucúndecu váha-yu núú Yă Ndiöxí ñá, te dàña-í mée-í dàcuíta nihnu ñaha Xítóhó Jesucrìstú nũu dìcò sá cúú. ⁴ Te nchaa ñăyiu cùu ndi mee-í-áⁿ cúú-yu ñăyiu isràél, te Yá Ndiöxí ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ïo cãhnu cuu-gá, te ní cãháⁿ ndáá-gá núú-yu nàcuáa cada ñaha-gă xii-yu, te ní xáhaⁿ-gă xii ndíi Moisés ní chídó tnùní ndíi nàcuáa cadá-yu cundecú-yu. Te ní xáhaⁿ-gă xii-yu nàcuáa cadá-yu cada cãhnu ñahá-yu xii-gá, te ní xáhaⁿ tùcu-gá xii-yu nchaa nàcuáa cada-gá ndéé cuéé-gá. ⁵ Te nchaa ñăyiu-áⁿ cúú-yu ñaní tnáhá nchàa cue téé ní cunuu ñí xíndecu ndéé sanaha, te ñiu-ni ñaní tnáhă-yu cùu Xítóhó Jesucrìstú Yaá ní tendaha Dütú Ndiöxí ní quixi ñuyíú-a, te tnáhá-gá cúú-gă Ndiöxí te ío cùnuu-gá, te nchaa nduu nchaa quíú ïo cãhnu cuu-gá. Te ducaⁿ na cùnduu.

6 Te vá cächí-ó sǎ Yǎ Ndiǒxí ñá túú ní quide-gá nchaa nàcuáa ní cachí-gá cada-gá cuendá sǎ ñǎ túú sàndáá iní ñáhá dǎva ñáyiú isràél xii-gá. Te sá dúcáⁿ xǐquide davá-yu te ñá túú quidé-yu nàcuáa tàú-xi cadá-yu sá cúǔ-yu ñáyiú isràél. Te ñáyiú ducaⁿ xǐquide-áⁿ cúǔ-yu ñáyiú ñá túú cùu cuendá ñáhá Yǎ Ndiǒxí. 7 Te cuèi nchaá-yu cùu-yu ñaní tnáhá ndíi Àbrahám dico ñá túú quidé-yu nchaa nàcuáa tàú-xi cunduu cadá-yu sá cúǔ-yu ñaní tnáhá ndíi. Te Yá Ndiǒxí ní xáhaⁿ-gǎ xii ndíi Àbrahám: “Nchaa cue ñaní tnáhá tǎ Isàác téé cùu déhe ducuⁿ-n, mee-ni cuè ñáyiú-áⁿ cuu ñaní tnáhá-n”, duha ní xáhaⁿ-gǎ xii ndíi Àbrahám. 8 Te xǎⁿ cútnùní iní-ó sǎ ñǎ ncháá ñáyiú cùu ñaní tnáhá ndíi Àbrahám cúǔ-yu ñáyiú cùu cuendá Yǎ Ndiǒxí, chi mee-ni ñáyiú sàndáá iní nàcuáa ní cáháⁿ-gá cada-gá, ñáyiú-áⁿ cúú cuendá-gá. 9 Te duha ndùu tnúhu ní xáhaⁿ Yǎ Ndiǒxí xii ndíi Àbrahám: “Sáá nduu te yúhú cada-í te coo ñⁿ déhe-n ndíhi ñadihí-n tǎ Sǎrá”, duha ní xáhaⁿ-gǎ xii ndíi.

10 Te ñá díú-ní xǎⁿ ní quide Yá Ndiǒxí, chi tnáhá ní ndatnúhu-gá ndíhi ndíi Rèbecá cútnàhá vitna ñùhu úú déhe ndíi ndíhi ndíi Isàác téé ní cuu ñaní tnáhá-ó ñǎ xíndecu ndéé sanaha. 11-13 Te cútnàhá vitna ñùhu-gá déhe ndíi Rèbecá, cútnàhá vátá cadá-gǎ-güexi ni ñⁿ sá cuèhé sá dúhá, te ni ñⁿ sá vǎha, ní xáhaⁿ Yǎ Ndiǒxí xii ndíi: “Déhe-n tǎe díhna na càcu te téé-áⁿ tñⁿ-dé nchaa tnúhu cáháⁿ déhe-n tǎe cùu uú ná càcu”, duha ní xáhaⁿ-gǎ xii ndíi Rèbecá. Te ní quee ndáá-xi nàcuáa ní cáháⁿ Yǎ Ndiǒxí núú tùtú-gǎ núú cächí-xi: “Té Jàcób ní cuu vǎha iní-í núú-dě, te té Esàù ñá túú ní cùu vǎha iní-í

núú-dě”, duha càchí-gá núú tùtú-gá. Te ducaⁿ nĩ cuu chi ducaⁿ nĩ cachí méé-gă cunduu sá càháⁿ-gá nchaa ñáyiú cuìní méé-gă, te ñá díú cuèndá ìⁿ chiúⁿ quidé-yu càháⁿ ñáhá-gă xií-yu.

14 jTe vá cúú tnàhí càháⁿ-ó sã Yă Ndiöxí ñá túú quide váha-gá sá dúcáⁿ quide-gá chi mee-gă ío ndáá quidé-gă! 15 Te mee-gă ní xáhaⁿ-gă xii ndíi Moisés: “Cundàhú iní-í chindee-í mee-ni cuè ñáyiú càchí iní-í”, duha ní xáhaⁿ-gă xii ndíi. 16 Te xiãⁿ cútnùní iní-ó sã cundàhú iní-gá ñáyiú chi ducaⁿ cuìní méé-gă cunduu, dico ñá túú cundahú iní ñáhá-gă xií-yu cuèndá sá dúcáⁿ cuìní-yu cada-gá, te ni ñà túú cundahú iní ñáhá-gă xií-yu cuèndá sá ío ndùcu ndeé-yu quidé-yu ìⁿ sá quidě-yu. 17 Te núú tùtú Yă Ndiöxí càháⁿ-xi nàcuáa ní xáhaⁿ-gă xii téé ní cuu Faràón téé ní xíndaha nàcióⁿ Ègiptú, te duha ní xáhaⁿ-gă: “Yúhú ní quide-í yíndàha-n ñáyiú cuèndá cada-í tìtní núú sã cáda-í núú-n cuèndá cutnùní iní-n sã ío càhnu cuu-í, te ducaⁿ nchàa ñáyiú ñuyíú cutnùní iní-yu sá yùhú cúú-í Ndiöxí”, duha ní xáhaⁿ-gă xii téé ní cuu Faràón. 18 Te xiãⁿ cútnùní iní-ó sã Yă Ndiöxí cundàhú iní-gá mee-ni cuè ñáyiú càchí iní méé-gă, te ducaⁿ ndàda díi-gá iní nchaa ñáyiú càchí iní méé-gă ducaⁿ càda-gá.

19 Te sá dúhá càháⁿ-í te dava-ndo quèsaha-ndo: “Ná cuèndá Yă Ndiöxí dácàa-gá cuéchi díquí ñáyiú núú ni ìⁿ-yu ñá ndácũ-yu quehdé nihnú-yu cuèndá sá vã cáda Yă Ndiöxí nàcuáa cuìní-gá”, quèsaha-ndo. 20 Te chí cuãha cuèndá sá dicó ñáyiú ñuyíú-a cùu-ndo te ñá túú ndùu váha-xi sá nchòhó càháⁿ-ndó ìⁿ tnúhu sá ñà túú ndùu váha sá cúú-xí Yă Ndiöxí. Te duha na càháⁿ-í núú-ndó nàcuáa

tecú tnùní-gá-ndó nàcuáa ndùu tnúhu càháⁿ-í. Te ñá túú xìní-ó sǎ ñⁿ quídi ñuhu cúñaha-xi xì ñáyiu ní cadúha ñaha xì-xì: “Ná cuendá duha ní cadúha ñaha-n xì-í”, cúñaha-xi. ²¹ Chi ñáyiu càdúha nchaa quídi-áⁿ cuu-ni cadúha-yu ndihi ñuhu cuěi nása na cùnduu quídi cadúha-yu canehe chiúⁿ-yu, chi ñⁿ-ni ñuhu cadúha-yu quídi cánehe chiúⁿ-yu ndi tnahá nduu sàcáo-yu vico ndihi quídi sá cǎnehe chiúⁿ-yu nduu cùtexínu.

²² Te ñiu-ni ducaⁿ quide Yá Ndiöxí, chi cuení-gá dandòho-gá ñáyiu ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sá ño càhnu cuu-gá. Te sa ndècu túha-ná-yu sá quihíⁿ-yu núú ùhú núú ndàhú, te cuěi ducaⁿ dico ío ta quide cahnu iní-gá cuáháⁿ. ²³ Te ducaⁿ quide-gá cuendá cutnùní iní nchaa ñáyiu ñuyíú sǎ ño váha quide-gá sá cúú-xí nchaa nchoo ñáyiu cùndahú iní-gá, chi ní cachí-gá sá nchóó cuè ñáyiu cùndahú iní-gá nduu táhú-ó cùndecu-o ndihi-gá núú ño váha càa ndecu-gá. ²⁴ Te dava nchoo ñáyiu ní cáháⁿ Yá Ndiöxí cúú-ó ñáyiu isràél, te dava-o cùu-o ñáyiu ñá túú cùu ñáyiu isràél. ²⁵ Te ní quee ndáá-xi nàcuáa ní xáhaⁿ Yá Ndiöxí xii ndíi Òseás téé ní xóo cáháⁿ tnúhu-gá ndéé sanaha ñi chídó tnùní ndíi núú tütú-gá núú càchí-xi:

Ñáyiu ñá túú cùu cuendá-í ní cùu te nduu cuendá-í-yu,

te ñiu-ni ñáyiu-áⁿ ñà túú cùu váha iní-í núú-yu ni cùu, dico vitna cùu váha iní-í núú-yu.

²⁶ Te ñiu-ni ñuú núú dúcáⁿ ñi cachí-í sá ñà túú ñáyiu cùu cuendá-í ñiu-ni ñuú-áⁿ coo ñáyiu

cuu déhe yúhú Dútú Ndiöxí Yaá ndécú tũu andiũ.

Duha ní xáhaⁿ Yă Ndiöxí xii ndíi Òseás ní chídó tnùní ndíi núú tütú-gá. ²⁷ Te ndíi Chàíá téé ní xóo cáháⁿ tucu tnúhu Yă Ndiöxí ndéé sanaha nĩ cáháⁿ ndíi cuèndá ñáyíu isràél, te duha ní cachí ndíi: “Cuèi cuéhé víhí ñáyíu isràél dàtná cuéhé ñuhu cúchí làmár dico sacú-ni-yu vá quíní-yu tnúndòho tnúhu ndàhú. ²⁸ Te Yă Ndiöxí ío ndíi cada-gá nchaa nàcuáa càháⁿ-gá ñuyíú”, duha ní cachí ndíi. ²⁹ Te ní cáháⁿ tucu ndíi nàcuáa cada-xi ndéé cuéé-gá, te ní cachí ndíi:

Yă Ndiöxí Yaá táxí tnùní nchaandi túhú sá ío andiũ ndíi ñuyíú ñà túú ní dànaa-gá nchaa ñáyíu isràél, chi núu ni ndíhí-yu danàa ñaha-gá, te nchoo cùu-o datná ní cuu nchaa ñáyíu ní xíndecu ñúú Sòdomá ndíi nchaa ñáyíu ní xíndecu ñúú Gòmorrá, te ndíi-o nàa datná ní naa nchaa ñáyíu-áⁿ ní cùu.

Duha ní cachí ndíi.

Ñáyíu isràél ñà túú sàndáá iní-yu tnúhu Xítóhó Jesucrístú

³⁰ Te sá cuèndá xíáⁿ nũ vitna càchí tnúhu-í xii-ndo sã cuè ñáyíu ñà túú cùu ñáyíu isràél ñà túú ní nànducu nihnú-yu nàcuáa cadá-yu cudiú-yu núú Yă Ndiöxí, dico vitna cudiú-yu núú-gá chi ní sàndáá iní-yu Xítóhó Jesucrístú. ³¹ Te ñáyíu isràél nchícúⁿ nihnú-yu tnúhu sá dánèhé ñáhá xii-yu nàcuáa cadá-yu cudiú-yu núú Yă Ndiöxí dico ñà túú cudiú-yu núú-gá chi ñà ndácũ-yu cadá-yu nchaa nàcuáa càháⁿ-xi. ³² Te ducaⁿ ñà túú cudiú-yu núú Yă Ndiöxí chi ñà túú sàndáá iní-yu Xítóhó

Jesucristú, te sàni iní-yu sá sã cuendá mee-ni nchàa sá quidé mèé-yu cudìú-yu núú-gã, te sá dúcáⁿ quidé-yu te cùú-yu dàtná ìⁿ ñáyiu nguñenu ìⁿ yúú te nduá-yu. Te ducaⁿ sãtnahá-xi cùú-yu chi ñá túú cùu váha iní-yu núú Xítohó Jesucristú. ³³ Te quèe ndáá-xi nàcuáa ní cáháⁿ Yã Ndiõxí ìⁿ xichi núú tütú-gá núú càchí-xi:

Yúhú táxi ndècu-í ìⁿ tée ñuú Sìon, te cuu-dé dàtná ìⁿ yúú, te yúú-ãⁿ nguñenu ñáyiu te nduá-yu, te nchaa ñáyiu na quìndáá iní ñáhá xii-dé, te vá ndíxí cuèchi iní-yu sá dúcáⁿ ñí sándáá iní ñáhã-yu xii-dé.

Duha càchí-gá núú tütú-gá.

10

¹ Te nchòhó ñáyiu ndècu ndihi-í ichi Xítohó Jesucristú càchí tnúhu-í xii-ndo sã cáháⁿ ndihi-í Yã Ndiõxí cuendá ñáyiu isràél, chi ío cuìní-í sá nánihí tàhú-yu. ² Te na cáháⁿ ndáá-í cuendá-yu sá ìo ndùcu ndeé-yu xìnu cuechí-yu núú Yã Ndiõxí, te dícó-ni sá ñá túú quidé-yu nàcuáa cuìní méé-gã cadá-yu. ³ Chi ñá túú quide cuendá-yu nàcuáa cuìní Yã Ndiõxí cada ñaha-gã xií-yu nàcuáa cudìú-yu núú-gã, te quide-ní-yu nàcuáa sàni iní méè-yu cudìú-yu núú-gã te ñá túú cuìní-yu tnií-yu tnúhu càháⁿ-gá nàcuáa cudìú-yu núú-gã. ⁴ Te Xítohó Jesucristú ní quide-gá cuendá sá vã cúnù-gá nchaa tnúhu ní chídó tnùní ndíi Moisés, te nchaa ñáyiu na quìndáá iní ñáhá xii-gá te ñiu-gá cada te cudìú-yu núú Yã Ndiõxí.

⁵ Te ndíi Moisés càháⁿ ndíi núú tütú ndíi cuendá ñáyiu cuìní cudìu núú Yã Ndiõxí cuendá sá nchìcúⁿ

nihnú-yu nchaa nàcuáa ní cáháⁿ ndíi. Te ní cachí ndíi sá ncháá ñǎyiu na càda nchaa nacuáa ní xáhaⁿ Yă Ndiǒxí xii ndíi ní chídó tnùní ndíi te naníhí tǎhú-yu, te núu òcò ndacú-yu cadá-yu nchaa nàcuáa ní cáháⁿ ndíi. ⁶ Dico vitna núu na quindáá iní-ó Xítohó Jesucristú, te cudíu-o núú Yă Ndiǒxí. Te duha càchí tnúhu ní chídó tnùní ndíi núú tütú-gá: “Vá cání iní-ndó sá xíní ñùhu-xi cada-ndo ñⁿ sá vǎ yǒo tnàhí ndàcu cada sá cáá tǔu-ndo àndíu te cúñaha-ndo xii Cristú cuuⁿ-ndo ndíhi-gá núú ñùyíú-a. ⁷ Te ni vǎ cání tucu iní-ndó sǎ quíhíⁿ túu-ndo núú xǐndecu nchaa ñáyiu ní xíhí te cada-ndo sǎ Crístú ndoto-gá”, duha càchí tnúhu-áⁿ sǎ vǎ dúcáⁿ càni iní-ó. ⁸ Te càchí tucu tnúhu-áⁿ: “Tnúhu Yá Ndiǒxí sá ndécú ndíhi ñaha-xi xii-ndo chí sàni iní-ndó cuendá tnúhu-áⁿ te càháⁿ-ndó”, duha càchí tnúhu-áⁿ. Te tnúhu sá ndécú ndíhi-ndo-áⁿ cúú-xí tnúhu càháⁿ-ndí núú ñáyiu, te xíni ñuhu-xi sá quindáá iní-yu tnúhu-áⁿ. ⁹ Te núu na nūnuu-ndo càháⁿ-ndó sǎ Xítohó Jesucristú cúú-gǎ Xítohó-ndó, te quindáá iní-ndó nì yuhu ni iní-ndó sǎ Yă Ndiǒxí ní dándótó-gǎ Xítohó Jesucristú, te naníhí tǎhú-ndó te núu ducaⁿ na càda-ndo. ¹⁰ Te nchaa ñáyiu ducaⁿ sàndáá iní te cáháⁿ-yu sá Xítohó Jesucristú cúú-gǎ Xítohó-yu, ñáyiu-áⁿ cúdíú-yu núú Yă Ndiǒxí te nàníhí tǎhú-yu.

¹¹ Te núú tütú Yă Ndiǒxí càchí-xi sá nì ñⁿ ñáyiu sàndáá iní ñáhá xii Xítohó Jesucristú vá ndíxí cuèchi iní-yu sá dúcáⁿ sàndáá iní ñáhǎ-yu xii-gá. ¹² Te sá cúú-xí Xítohó Jesucristú chí ñⁿ-ni cùu ñáyiu isràél ndíhi ñáyiu ñǎ túú cùu ñáyiu isràél, chí díu-gá cúú-gǎ Yaá cúnùu taxi tnuní-gá nchaa ñáyiu, te ío váha quíde-gá sá cúú-xí ncháa ñáyiu càháⁿ ndíhi

ñaha xì-gá. ¹³ Te quèe ndáá-xi nàcuáa càháⁿ-xi núú tütú Yă Ndiöxí núú càchí-xi: “Nchaa ñáyiú na càháⁿ ndàhú núú Xítóhó Jesucrístú sá dácacu nihnu ñaha-gă xii-yu, te ñáyiú-áⁿ naníhí tàhú-yu”, duha càchí-xi núú tütú-gá. ¹⁴ Te ñáyiú-áⁿ vă nihí-yu nàcuáa cáháⁿ ndàhú-yu núú-gă te núú ñá túú sàndáá iní ñáhă-yu xii-gá, te ni vă nihí-yu nàcuáa cadá-yu quindáá iní ñáhă-yu xii-gá te núú vátá cùndèdóho-gá-yu tnúhu-gá, te ni vă nihí-yu tnúhu-gá te núú vá yôo quíhíⁿ cútnuhu ñaha xì-yu. ¹⁵ Te ni vă yôo quíhíⁿ ducaⁿ cútnuhu ñaha xì-yu tnúhu-gá te núú Yă Ndiöxí vá téndàha-gá ñáyiú quíhíⁿ cútnuhu ñaha xì-yu. Te núú tütú Yă Ndiöxí càchí-xi: “Ío vii ío váha cùu iní-ó vĕxi ñáyiú dānehé ñáhá xì-o nacuáa ndùu tnúhu sá càháⁿ nàcuáa naníhí tàhú-ó”, duha càháⁿ-xi núú tütú-gá.

¹⁶ Te ñá ncháă-yu cuiní-yu quindáá iní-yu tnúhu-áⁿ. Te ní quee ndáá-xi nàcuáa ní xáhaⁿ ndĭi Chàíá xii Yă Ndiöxí te duha ní xáhaⁿ ndĭi xii-gá: “Yòhó Dútú Ndiöxí na nàcani tnúhu-í núú-n să ĩo sacú-ni ñáyiú sàndáá iní-yu tnúhu càháⁿ-ndĭi”, duha ní xáhaⁿ ndĭi xii-gá. ¹⁷ Te xìni ñuhu-xi sá dĭhna-gá cundèdóho-yu tnúhu-áⁿ cuendá ducaⁿ te quindáá iní-yu, te tnúhu-áⁿ cúú-xí tnúhu Xítóhó Jesucrístú.

¹⁸ Te vá cúú càháⁿ-ó să ñà túú ní nihí ñáyiú isràél tnúhu-gá, chi ncháá-yu ní nihí-yu tnúhu-gá, chi núú tütú Yă Ndiöxí càchí-xi:

Cue tée ní cáháⁿ tnúhu Yă Ndiöxí ní cáháⁿ-güedé
tnúhu-gá núú ñáyiú,

te tnúhu-áⁿ ní xíté nuu-xi nihí ñuyú.

Duha càchí-xi núú tütú-gá. ¹⁹ Te ni vă càháⁿ-ó să ñáyiú isràél ñá túú ní cùu tnuní iní-yu nàcuáa ndùu

tnúhu-gá chi ní tecú tnùní-yu. Te ndéé sanaha nĩ chídó tnùní ndíi Moisés nàcuáa ní xáhaⁿ Yã Ndiöxí xii ñáyiú isràél, te duha ní xáhaⁿ-gã xii-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùtnuní iní-xi nàcuáa cada váha cundecu núu-í, te nchòhó cudééⁿ-ndó nũ-yu te cuu cuédú iní-ndõ-yu.

Duha ní xáhaⁿ Yã Ndiöxí xii-yu te ducaⁿ nĩ chídó tnùní ndíi Moisés. ²⁰ Te ndíi Chàia ñá túú tnàhí ni yúhú ndíi ní quide ndíi núú Yã Ndiöxí ní cáháⁿ ndíi tnúhu-gá, te ní cachí ndíi:

Ñáyiú ñá túú nànducu ñaha xii-í ní cùu ní naníhí ñáhã-yu xii-í, te ni ñà túú ndùcu tnúhu ñàhá-yu xii-í ní cùu te ní xiní ñáhã-yu.

Duha ní cachí ndíi Chàia ní cáháⁿ ndíi tnúhu Yá Ndiöxí. ²¹ Te ní quide tucu ndíi núú Yã Ndiöxí ní cáháⁿ ndíi tnúhu-gá cuèndá ñáyiú isràél, te ní cachí ndíi: “Nchaa-ni nduu yìhi-í càháⁿ-í ñáyiú isràél te ñá túú cuìní-yu quìndáá iní-yu chi ío sàá iní-yu”, duha ní cachí ndíi Chàia ní cáháⁿ ndíi tnúhu Yá Ndiöxí.

11

Cuèndá ñáyiú isràél ñáyiú naníhí tàhú

¹ Te cuèi ducaⁿ dico vá càháⁿ-ó sã Yã Ndiöxí dáquèe tìhú-gã ñáyiú isràél chi ñiu-ni ñáyiú-áⁿ cúu cuèndá-gá, chi yúhú tnàhá-í cùu-í mei tõe isràél, te ñani tnàhá-í ní cuu ndíi Àbrahám tée ní xíndecu ndéé sanaha vihi-gá, te ñiu-ni ñani tnàhá-í ní cuu tucu ndíi Benjamín. ² Te ndéé sanaha dùcaⁿ ní cachí Yã Ndiöxí sá nchùhú ñáyiú isràél cúu-ndí

ñáyiú cùu cuendá-gá, te ñá túú dàquee tíhú ñáhá-gă xii-ndí, te nchòhó sa xìní-ndó nàcuáa càháⁿ-xi núú tütú Yă Ndiöxí núú càchí-xi nàcuáa ní quide té Èliás ní ndacáⁿ cuéchi-dé núú-gă cuendá ñáyiú isràél. ³ Te duha ní xáhaⁿ-dě xii-gá: “Yòhó Dútú Ndiöxí, ná nàcani tnúhu-í núú-n sǎ ñí sahní-yu cue tée càháⁿ tnúhu-n, te ní dátñànú-yu núú xihí quiti ndùu táhú-n, te yúhú-nǎ ní cácu-í ndécù-í dico nànducu ñahá-yu chi tnàhá-í cuìní-yu cahni ñàhá-yu xii-í”, duha ní xáhaⁿ-dě xii Yă Ndiöxí. ⁴ Te Yă Ndiöxí ní xáhaⁿ-gă xii-dé: “Sa ní dáquée dèiⁿ-í úsá mìl cue tée cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiöxí-yu te ñá ndàá sá ndiöxí cúú-xí”, duha ní xáhaⁿ-gă xii té Èliás. ⁵ Te ducaⁿ sǎtnahá-xi cùu vitna chi xĩndecu ñáyiú ní cáháⁿ-gá ní chĩtnahá ñáhá xii-gá, te ducaⁿ ñí quide-gá chi ní cundàhú iní ñáhá-gă xii-yu. ⁶ Te ducaⁿ ñí cáháⁿ ñáhá-gă xii-yu sá cundàhú iní ñáhá-gă, te ñá díú cuendá ñⁿ chiuⁿ quidé-yu ducaⁿ ñí cáháⁿ ñáhá-gă xii-yu, chi núu dicó cuendá ñⁿ chiuⁿ quidé-yu ducaⁿ ñí cáháⁿ ñáhá-gă xii-yu ña, te ñá díú-gă sá cúú iní mée-gă ducaⁿ ñí cáháⁿ ñáhá-gă xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuìní-yu cudíú-yu núú Yă Ndiöxí dico ñá ndácũ-yu, dico dava ñáyiú ní cáháⁿ-gá ñáyiú-áⁿ cúdíú-yu núú-gă, te ñáyiú ducaⁿ ñà túú cùdũ núú-gă-áⁿ ïo ní cuu sàá iní-yu núú-gă. ⁸ Te ní quee ndáá-xi nàcuáa càháⁿ-xi núú tütú Yă Ndiöxí núú càchí-xi: “Yă Ndiöxí ní cachí-gá sá cúú-yu ñáyiú ïo ñí dǐquí-xi, chi cuèi ndèhé-yu nàcuáa càháⁿ tnúhu-gá dico ñá cútnùní iní-yu nàcuáa càháⁿ-xi,

te cuẽi ndèdóho-yu dico ñá túú quẽe díquĩ-yu, te ducaⁿ-ni quidé-yu ndéé vitna”, duha càchí-xi núú tütú-gá. ⁹ Te ndíi Dàvíi ní cachí ndíi:

Ñáyiú ío váha ndècu te cùdíi ìní-yu quidé-yu vico, dico yáha-yu dàtná yáha ìⁿ quiti ngáva trampá àdi ìⁿ quiti ñá cútnùní ìní-xi quée xití ñunu, chi cuíta nihnú-yu te nacháhu-yu nchaa sá quidẽ-yu.

¹⁰ Te cùú-yu ñáyiú ñá túú vèdana tècú tnùní, te cùu tucú-yu dàtná ìⁿ ñáyiú ío ndòho nchido ìⁿ sá vèe.

Duha ní cachí ndíi Dàvíi.

Ñáyiú ñá túú cùu ñáyiú isràél naníhí tàhú-yu

¹¹ Te cuẽi ducaⁿ dico vá càchí-ó sã sã dúcáⁿ ñà túú ní quide ndáá ñáyiú isràél te ní xíta nihnu duúⁿ-yu, te ñáhá chi sá dúcáⁿ ñi quidé-yu te ní ngúndecu ndihí dava-gá ñáyiú tnúhu sá càháⁿ nàcuáa naníhí tàhú-yu, te ñáyiú isràél quini-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudíi ìní-yu naníhí tàhú-yu. ¹² Te sá dúcáⁿ ñi quide sàá ìní-yu ñá túú ní quide ndáá-yu núú Yã Ndiõxí, te xíãⁿ ní cuu-xi ìⁿ sá váha sá cúú-xí ñáyiú nihí ñuyíú, dico sáá nduu te cada ñáyiú isràél nchaa nàcuáa càháⁿ Yã Ndiõxí, te dàvá-áⁿ ìo-gá váha cuu xii nchaa ñáyiú nihí ñuyíú.

¹³ Te nchòhó ñáyiú ñá túú cùu ñáyiú isràél càchí tnúhu-í xii-ndo sã Yã Ndiõxí ní cachí-gá sá càháⁿ-í tnúhu-gá núú-ndó, te yúhú càchí-í sá ío càhnu cuu chiuⁿ quide-í. ¹⁴ Te duha càháⁿ-í cuendá sá ñuu cudana ío dava ñáyiú cùu ndi mee-í cudíi ìní-yu cada váha ñaha Yã Ndiõxí xií-yu dàtná quidé váha ñaha-gã xii-ndo, te naníhí tàhú-yu. ¹⁵ Te sá cuendá

sá nǐ quee tíhú ñáyiú isràél ní nacáháⁿ cáhnú ìní tnahá ñáyiú ñihí ñuyíú ndihì Yá Ndiöxí, dico na sàá nduu nùcúndecu váha ñáyiú isràél ndihì Yá Ndiöxí, te ío-gá váha tnahá ñáyiú ñihí ñuyíú, te ñáyiú-áⁿ cada iní-ó sǎ cúŷ-yu dàtná ñáyiú ní xíhí, dico dàvá-áⁿ cada tucu iní-ó sǎ cúŷ-yu dàtná ñáyiú ní ndoto chi nucúndecu váha-yu ndihì-gá. ¹⁶ Te núu sá lúhá-ní ñⁿ tílúlú yusaⁿ càváha te ñiú-ni ducaⁿ càváha ñihí. Te núu càváha yóho ñⁿ yutnu te ñiú-ni ducaⁿ càváha-xi ñihí-xi. Te ñiú-ni ducaⁿ sǎtnahá-xi cùu ñáyiú isràél, chi ñani tnahá-yu ní xíndecu ndéé sanaha nǐ cuú-yu ñáyiú ní cuu cuendá ñáhá Yá Ndiöxí, te ñiú-ni ducaⁿ cùu cuendá ñáhá-gǎ xii mée-yu ndéé vitna.

¹⁷ Te ìo ñⁿ yutnu váha nàni olívú, te dava dité yutnu-áⁿ nǐ téhndé te ní nucódó dité yutnu òlívú cùtexínu, te mee-nǎ yutnu òlívú váha-áⁿ ìo váha quide-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cúú-xí dàtná ñáyiú isràél, te nchaa dité-xi sá nǐ téhndé-áⁿ cúú-xí ñiú-ni ñáyiú isràél ñáyiú ñá túú tnahá tnúhu ndihì Yá Ndiöxí. Te dité yutnu òlívú cùtexínu sá nǐ nucódó tnahá-áⁿ cúú-xí dàtná ñáyiú ñá túú cùu ñáyiú isràél tnahá tnúhu ndihì Yá Ndiöxí. ¹⁸ Te vá cání ìní-ndó sǎ sǎ dúcáⁿ ndècu váha-ndo ndihì Yá Ndiöxí te ío cùnūu-ndo dacúúxí ñáyiú isràél, te vá dúcáⁿ càni iní-ndó chi sá cuendá nchaa ñani tnahá ñáyiú isràél ní xíndecu ndéé sanaha ducaⁿ ndècu váha-ndo ndihì Yá Ndiöxí vitna, te ñá díú sǎ cuendá nchòhó ndécú ndihì váha ñáyiú-áⁿ Yá Ndiöxí vitna.

¹⁹ Te cudana sàni iní-ndó te càchí-ndó sǎ ñáyiú isràél ní quee tíhù-yu cuendá sá nchòhó nucuíñí-ndó

nũ-yu nucúndecu váha-ndo ndìhi Yá Ndiõxí. ²⁰ Te ndáá sá ñi quee tíhũ-yu chi ñá túú ní sàndáá iní ñáhã-yu xii-gá, te nchòhó ío váha cùu ndecu-ndo ndìhi-gá chi ní sàndáá iní-ndó-gã, dico vá càchí-ndó sã ïo càhnu cuu-ndo, te ío váha chí cuãha cuendá nàcuáa cundecu-ndo. ²¹ Te cue ñáyiu isràél cúũ-yu ñáyiu cùu cuendá-gá ní cùu te ní dáquée tíhú ñáhã-gã xií-yu cuendá sá ñã túú ní sàndáá iní ñáhã-yu xii-gá, te tnàhá nchòhó daquée tíhú ñáhã-gã xii-ndo te núu na càda-ndo datná ní guide ñáyiu-áⁿ. ²² Te chí cádá cuendá sá Yã Ndiõxí ío váha iní-gá, dico cùdééⁿ-gã núú nchaa ñáyiu ñá túú sàndáá iní ñáhã xii-gá, dico sá cúú-xí nchòhó cue ñáyiu sàndáá iní ñáhã xii-gá chi ío váha iní-gá. Te ducaⁿ-ni cùnduu váha iní-gá sá cúú-xi-ndó te núu vá dáñã ndèé-ndó càda-ndo nacuáa càhãⁿ-gá cuendá sá ïo váha iní-gá, te núu ñáhã te tnàhá nchòhó quee tíhú-ndó dàtná ní quee tíhú ñáyiu isràél, ñáyiu ñá túú ní sàndáá iní ñáhã xii-gá. ²³ Dico núu ñáyiu isràél ñáyiu ní dáquée tíhú ñáhã Yã Ndiõxí quíndáá iní ñáhã-yu xii-gá te nduu cuendá ñáhã tucu-gá xií-yu, te ñáyiu-áⁿ cúũ-yu dàtná dava dité yutnu òlívú sá ñi téhndé te ní nucódó tnáhã tucu. Te ducaⁿ sãtnahã-xi cùú-yu te núu na quíndáá iní ñáhã-yu xii-gá. ²⁴ Te nchòhó cúú-ndó dàtná nchaa dité yutnu òlívú cùtèxínu, chi ñã díú ñáyiu isràél cúú-ndó, te dité nchaa yutnu òlívú cùtèxínu-áⁿ ñi nucódó-xi núú dité yutnu òlívú váha-áⁿ. Te yáchí-gá nucúndecu váha ñáyiu isràél ndìhi Yá Ndiõxí, chi cùú-yu dàtná nchaa dité yutnu òlívú váha sá ñi téhndé te ní nucódó tnáhã tucu.

Te ducaⁿ sãtnahá-xi cùú-yu te núu na quìndáá iní ñáhã-yu xii-gá.

Sáa nduu te naníhí tãhú ñáyiu isràél

²⁵ Te nchòhó ñáyiu ndècu ndihí-í ichi Xítohó Jesucristú, na càchí tnúhu-í xii-ndo ìⁿ tnúhu ndùu yuhu ni cuu, cuèndá sá vã cání ìní-ndó sã ïo-gá váha sáa díquí-ndó dàcúúxí ñáyiu isràél, chi dava ñáyiu isràél cúú sáa iní-yu núú Yã Ndiõxí ñini na ndihí ñáyiu ní cachí Yã Ndiõxí ngúndecu váha ndihí ñáhã-yu xii-gá, ñáyiu ñã túú cùu ñáyiu isràél. ²⁶ Te nduu na ndihí ñáyiu-áⁿ ngúndecu váha-yu ndihí Yá Ndiõxí, te dàvá-áⁿ naníhí tãhú ñáyiu isràél chi quee ndáá-xi nàcuáa càháⁿ Yã Ndiõxí núú tütú-gá núú càchí-xi:

Ndàa ñuú Siòn quixi Yaá cada naníhí tãhú nchaa ñáyiu,
te ñu-ni Yaá-áⁿ cada-gá cuèndá sá dáñã nchaa ñáyiu isràél ichi cuèhé ichi duha.

²⁷ Te yúhú cada càhnu iní-í nchaa cuéchi ñáyiu isràél, chi cada-í dàtná ní cachí-í ndéé sanaha. Duha càchí Yã Ndiõxí núú tütú-gá.

²⁸ Te sá cuèndá tnúhu sá càháⁿ nàcuáa naníhí tãhú-ó xíãⁿ cúú ùhú iní ñáyiu isràél Yã Ndiõxí, te sá dúcáⁿ quidé-yu xíãⁿ nchòhó ní níhí-ndó tnúhu sá càháⁿ nàcuáa naníhí tãhú-ndó. Te ní cachí Yã Ndiõxí sá ñáyiu isràél cuu cuèndá-gá, te cùu iní ñáhã-ní-gã xíí-yu, te ducaⁿ quidè-gá chi ducaⁿ ñí xáhaⁿ-gã xii cue ñaní tnáhã-yu ní xíndecu ndéé sanaha. ²⁹ Te Yá Ndiõxí ñã túú ndùu úhú iní-gá ìⁿ sá táxí-gã, te ni ñã túú ndixi cuéchi iní-gá sá càháⁿ ñáhã-gã xii-o. ³⁰ Te nchòhó chi ñã túú sàndáá iní-ndó Yã Ndiõxí ní cùu, dico vitna ñini ñã túú

sàndáá iní ñáhá ñǎyiu isràél xii-gá, te ní cundàhú iní ñáhá-gǎ ní dácácu nihnu ñaha-gǎ xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cútnàhá ñá túú ní xóo quindáá iní-ndó-gǎ. Dico sáá nduu te natuha ñáhá-yu xii-gá te dácácu nihnu ñaha-gǎ xií-yu sá cundàhú iní ñáhá-gǎ dàtná ní quide ñaha-gǎ xii nchòhó. ³² Te Yá Ndiǒxí ní dáñá-gǎ sá dúcáⁿ cùnduu saá iní nchaa ñáyiu cuendá cuíní-gá cundàhú iní ñáhá-gǎ xií-yu.

³³ Te súúní vǎha quide ñaha Yá Ndiǒxí xii-o, te ío vǎha xìní-gá nchaa cuèi sá ío andiu te cuèi sá ío ñuyíú-a, te ducaⁿ ío vǎha sàá nchaa sá xìní tnùní-gá. Te ñá ndácú-ó cùtnuní iní-ó ñǎ cúú nchàa sá sání iní-gá cada-gá, te ni ñǎ ndácú-ó cùtnuní iní-ó nàcuáa nduu cuendá nchaa sá quidé-gǎ. ³⁴ Te núú tütú-gá càchí-xi: “Vá yǒo ñⁿ cùtnuní iní-xi nàcuáa sàni iní Yá Ndiǒxí, te ni vǎ yǒo ñⁿ ndàcu dachahu iní ñáhá xii-gá nàcuáa cáháⁿ-gá. ³⁵ Te Yá Ndiǒxí ñá túú quide yica iní-gá cada-gá sá vǎha sá cúú-xí ñáyiu cuendá ñⁿ sá sǎñáhá-yu xii-gá chi ñá túú dùcaⁿ quide-gǎ”, duha càchí-xi núú tütú-gá. ³⁶ Te ducaⁿ chi mee Yá Ndiǒxí ní taxi ndecu-gá nchaandi túhú sá ío ñuyíú, te diu-ni mee-gǎ táxí tnùní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sǎ ío càhnu cuu-gá ni caa ni quíhíⁿ. Te ducaⁿ na cùnduu.

12

Cada-o nàcuáa nduu vétú iní Yá Ndiǒxí

¹ Te vitna nchòhó ñáyiu ndècu ndihí-í ichi Xítohó Jesucrístú càchí tnúhu-í xii-ndo sǎ Yá Ndiǒxí cundàhú iní ñáhá-gǎ xii-o chìndee ñaha-gá, núú xíáⁿ cáháⁿ ndàhú-í núú-ndó sǎ dáñá-ndó mèe-ndo núú

ndáhá-gă, te cada iní-ndó sǎ cúú-ndó dàtná ìⁿ táhú sǎ nchító-ó nǐ nduu táhú-gă. Te cuu-ndo ñǎyiu váha ñáyiu cada nchaa nàcuáa nduu vétú iní Yǎ Ndiǒxí chi ducaⁿ tàú-ndó càda-ndo sá cúú-xí-gă. ² Te vá cǎnchìcúⁿ nihnu-gá-ndó càda-ndo datná xǐquide nchaa ñáyiu ndècu ichi cuehé ichi duha ndècu ñuyíú-a, te vá cùhúⁿ-gă iní-ndó ìchi cuehé ichi duha-án, chi mee-nǎ sá vǎha cuhuⁿ iní-ndó, te ducaⁿ te cutnùní iní-ndó nchàa nacuáa cuìní Yǎ Ndiǒxí cada-ndo, te nchaa sá cuìní-gá cada-ndo cùu-xi mee-ni sá vǎha, sá ìo váha ndùu vétú iní-gá, te cùu-xi nchaa sá xíní ñùhu-xi cada-ndo núú-gă.

³ Te sá cuendá chùⁿ ní cundàhú iní ñáhá Yǎ Ndiǒxí ní taxi-gá xii-í xǎⁿ nùu na cǎháⁿ-í dóho-ndo vitna: Vá cǎní iní-ndó ìⁿ sá ñà túú tàú-ndó cǎni iní-ndó te cucahⁿ-ndo sǎ ìo cǎhnu cuu-ndo. Te nchòhó ní sǎndáá iní-ndó Yǎ Ndiǒxí nùu chindee ñaha-gá xii-ndo, te vitna chí cuáha cuendá nùu ná daha núú chùⁿ-gá ndacu-ndo càda-ndo. ⁴ Te nchoo tìtní xichi cùu yiqui cuñú-ó, te ndi dǐíⁿ ndì dǐíⁿ chùⁿ quide-xi ìⁿ ìⁿ-xí. ⁵ Te ducaⁿ sǎtnahá tucu-xi cùu nchoo ñáyiu ndècu ndìhi Xítóhó Jesucristú chi cuèi ná daha tnàhá-ó dico ìⁿ-ni cùu-o ndìhi-gá, te ducaⁿ mèe-o tucu ìⁿ-ni cùu-o.

⁶ Te mee Yǎ Ndiǒxí ní cundàhú iní ñáhá-gă xii-o nǐ taxi-gá chùⁿ taú-ó càda-o ìⁿ ìⁿ-o te chindee ñaha-gá xii-o, te xìni ñuhu-xi cada-o nacuáa ndùu chiuⁿ ní taxi-gá cada-o. Te núu ní nduu táhú-ó nǔú-gă sá cǎháⁿ-ó tnùhu sá dǎcàhu iní ñáhá mèe-gá xii-o te cǎháⁿ-ó nàcuáa sǎndáá iní-ó chindee ñaha-gá xii-o, ⁷ àdi ní nduu táhú-ó nǔú-gă sá ìo váha chindee-o tnàha ñáyiu-o te dǐu-ni ducaⁿ càda-o, àdi ní nduu táhú-ó dǎnehé-ó ñáyiu tnúhu-gá te

d̄iu-ni ducaⁿ càda-o, ⁸ àdi ní nduu táhú-ó nǔú-gǎ sá dácàháⁿ-ó ñǎyiu canchicúⁿ nihnú-yu ichi-gá te d̄iu-ni ducaⁿ càda-o, àdi ní nduu táhú-ó nǔú-gǎ sá cuǎñaha-o xii tnaaha ñáyiu-o sǎ nihí-ó ndècu ndihí-o te d̄iu-ni ducaⁿ càda-o, dico ni yùhu ni iní-ó cuǎñaha-o xii-yu, àdi ní nduu táhú-ó nǔú-gǎ taxi tnùn-í-ó te d̄iu-ni ducaⁿ càda-o, te ni yùhu ni iní-ó càda-o, àdi ní nduu táhú-ó nǔú-gǎ chindee-o cuè ñáyiu ndècu ndihí tnúndòho tnúhu ndàhú te d̄iu-ni ducaⁿ càda-o, te ío cudíí iní-ó càda-o chiuⁿ-áⁿ.

Nchaa nàcuáa tàú-xi cada nchaa ñáyiu ndècu ichi Xítóhó Jesucristú

⁹ Te cuu iní tnáhá ndìsa-ndo ìⁿ ìⁿ-ndo, te daña-ndo nchàa sá cuèhé sá dúhá te cada-ndo mèe-ni sá vǎha. ¹⁰ Te ío cuu iní tnáhá-ndó, te cada-ndo cuendá sá ííⁿ-ní ñáyiu cùu-ndo, te ìⁿ ìⁿ-ndo càni-gá iní-ndó cànehe yiñuhu núú tnáhá-ndó.

¹¹ Te nducu ndèe-ndo cada-ndo nchaa chiuⁿ tahu Xítóhó Jesucristú vá tùhío-ndo, te cada-ndo ni yuhu ni iní-ndó sǎ cúú-xí-gǎ.

¹² Te ío cudíí iní-ndó cùndecu-ndo chi ní ngúndecu ndihí-ndo tnùhu ndee iní sá cùndècu ndihí-ndo Xítóhó Jesucristú, te cada càhnu iní-ndó cuèi nándi na càda ñaha ñáyiu xii-ndo sǎ cuendá-gá, te vá dáñá ndèe-ndó cǎháⁿ ndihí-ndo Yǎ Ndiǒxí.

¹³ Te chindee tnàha-ndo te núu ío dava nchòhó ñáyiu ndècu ichi-gá ío ìⁿ sá cúmǎní xii-ndo, te ío vǎha cuu iní-ndó còto-ndo ñáyiu véxi vehe-ndo.

¹⁴ Te cǎcáⁿ táhú-ndó nǔú Yǎ Ndiǒxí cuendá nchaa ñáyiu nándi quide ñaha xii-ndo, te cǎcáⁿ táhú-ndó nǔú-gǎ sá ná chindee ñaha-gá xii-yu te ñá díú dà

cácáⁿ táhú-ndó nũú-gă sá ná dàcuíta nihnu ñaha-gă xií-yu.

15 Te núu íò ñáyíu cùdíí ìní-xi te cudíí ìní-ndó ndìhí-yu, te núu íò ñáyíu ndìhú ìní-xi te ndìhú ìní-ndó ndìhí-yu.

16 Te cuu ìⁿnuu-ndo cùndecu-ndo, te vá cádá càhnu-ndo mee-ndo, te tnahá tnúhu-ndo ndìhi nchaa ñáyíu ndàhú ìní-xi, te vá cání ìní-ndó sã ìo-gá túha-ndo.

17 Te vá nánchòcáva-ndo nàchinaa-ndo ìⁿ sá quidé ñàha ñáyíu xii-ndo, te ío nducu ndèe-ndo cada-ndo mee-ni sá vãha nàcuáa cuu váha ìní ñáyíu. 18 Te ío nducu ndèe-ndo cada-ndo sá ndácú-ndó cùndecu váha-ndo ndìhi nchaa ñáyíu. 19 Te nchòhó ñáyíu ío cùu ìní-í, vá cání ìní-ndó nàchinaa-ndo ìⁿ sá cádá ñàha ñáyíu xii-ndo, chi cundetú-ndo sã méé Yă Ndiõxí ná nàchinaa-gá sá quidé ñàhá-yu xii-ndo, chi quee ndáá-xi nàcuáa càháⁿ Yă Ndiõxí núú tütú-gá núú càchí-xi: “Yúhú dandòho-í-yu chi nachinaa-í nchaa sá quidě-yu”, duha càchí-gá núú tütú-gá. 20 Te xini ñuhu tucu-xi cada-ndo nacuáa càháⁿ tucu-xi ìngá xichi núú tütú-gá núú càchí-xi: “Te núu ñáyíu cùu úhú ìní ñàhá xii-ndo ñá túú sã cóhó sã cáxí-yu te cuáñaha-ndo xii-yu, te núu ducaⁿ na càda-ndo te ío cucahaⁿ núú-yu”, duha càchí-xi núú tütú-gá. 21 Te núu íò ìⁿ sá quidé ñàha tnaha ñáyíu-ndo xii-ndo te vá nánchòcáva-ndo nàchinaa-ndo sá quidé ñàhá-yu xii-ndo, chi cada-ndo sã vãha sá cúú-xí-yu, te ducaⁿ te vá cádá-ndó sã ñà túú tàú-ndó càda-ndo núú Yă Ndiõxí dàtná quidě-yu.

13

¹ Te nchaa ñáyiú tòú-yú quíndáá iní-yú nchaa cue téé cùchiuⁿ, chí Yá Ndiöxí ní cachí-gá sá cùndècu téé cùchiuⁿ ñuyíú-a, núu xǎⁿ xǐndecu-güedé vitna. ² Te nchaa ñáyiú ñá túú sàndáá iní ñáhá xìi cue téé cùchiuⁿ ñá túú tnhá iní Yá Ndiöxí sá dúcáⁿ quidé-yú, chí mee-gǎ ní cachí-gá sá cùndècu-güedé. Te nchaa ñáyiú ducaⁿ ñá túú sàndáá iní ñáhá xìi cue téé cùchiuⁿ nacháhu-yú sá dúcáⁿ quidé-yú. ³ Te nchaa ñáyiú quide váha ñá túú yùhú-yú cue téé cùchiuⁿ chí quide váha-yú, dico nchaa ñáyiú ñá túú quide váha chí xǐyùhú-yú cue téé cùchiuⁿ. Te vitna núu nchòhó cuení-ndó sǎ vǎ yùhú-ndó cuè téé cùchiuⁿ te chí cáda vǎha, te ducaⁿ te cáháⁿ váha-güedé cuèndá-ndó. ⁴ Te Yá Ndiöxí ducaⁿ ní cachí-gá cundecu-güedé cuèndá cada-güedé sá ñá túú ñá cuu cundecu-ndo, te núu ñá túú quide váha-ndo ndècu-ndo te quíyùhú iní-ndó núú-güedé, chí ñá túú àúⁿ ñá cuu ndècu ndíhi-güedé tnúhu ndee iní dandòho-güedé nchaa ñáyiú ñá túú quide váha, chí Yá Ndiöxí ducaⁿ ní cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. ⁵ Núu xǎⁿ ío xìni ñuhu-xi sá quíndáá iní-ndó nchaa cue téé cùchiuⁿ, te ñá díú sǎ yùhú-ndó dàndòho ñaha-güedé xii-ndo, chí cada-ndo sǎ cútnùní iní-ndó sǎ cúú-xí ñⁿ sá vǎha. ⁶ Chí ñiú cuèndá xǎⁿ sàcáⁿ-ndó díhúⁿ núú cuè téé cùchiuⁿ, te ducaⁿ chí Yá Ndiöxí ducaⁿ ní cachí-gá cundecu-güedé te ñiú-ná chìuⁿ ndeé-güedé ñúhú iní-güedé.

⁷ Te nacháhu-ndo nchaa sá tòú-ndó núú nchaa ñáyiú tòú-ndó núú-xi, te cuèi díhúⁿ tòú-ndó cuèndá

ñuhu-ndo nũú cuè téé cùchiuⁿ àdi nágá díhúⁿ tàú-ndó nũú-güedě te nacháhu-ndo nũú-güedě. Te ío-gá canehe-ndo sã yíñuhu núú nchàa ñáyiú cùnuu, te cáháⁿ váha-ndo ndìhí-yu. ⁸ Te vá dácuidó-ndó ndùu nacháhu-ndo sã tàú-ndó nũú tnàha ñáyiú-ndo, te cuu iní tnáhá-ndó ñⁿ ñⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuaá càháⁿ tnúhu sá sánú ìchi ñaha xii-o nacuaá cada-o cùndecu-o. ⁹ Te duha ndùu tnúhu càháⁿ Yã Ndiõxí cuendá nchaa sá vã cúú càda-o: “Nchaa nchòhó cue téé vá cáháⁿ ndihí-ndo ñáyiú dìhí te núu ñá díú ñàdihí-ndó cùú-yu, te ducaⁿ-ni nchàa nchohó cue ñáyiú dìhí tucu vá cáháⁿ ndihí-ndo tēe te núu ñá díú yì-ndo cuu-güedé, te vá cáhni-ndó tnàha ñáyiú-ndo, te vá dúhú-ndó sã ndécú ndìhí-yu, te vá dácàcu-ndo cuéchi neñúú, te vá xihó-ndó sã ndécú ndìhi tnaha ñáyiú-ndo”, nchaa xéhé càchí Yã Ndiõxí sá vã cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núu quide-o ñngá tnúhu sá càchí-xi: “Cuu iní-ndó nchàa tnaha ñáyiú-ndo dàtná cúú ñí-ndó mēe-ndo”, duha càháⁿ tnúhu-áⁿ. Te nchaa dava-gá quidé-ó te núu quide-o nacuaá càháⁿ tnúhu-a. ¹⁰ Te nchaa ñáyiú cùu iní tnàha ñáyiú-xi te ñá túú quide úhú ñí-yu tnàha ñáyiú-yu, te núu ducaⁿ cùu ñí-yu tnàha ñáyiú-yu te quidé-yu nàcuáa càháⁿ tnúhu sá sánú ìchi ñaha xii-o nacuaá cada-o cùndecu-o.

¹¹ Te ducaⁿ xini ñuhu-xi cada-ndo chi sa ní cutnùní ñí-ndó nàcuáa ta xica nduu cuáháⁿ ñuyiú-a, te ní sáá nduu sá ño xini ñuhu-xi ndixi túu ñí-ó càda-o nchaa nacuaá càháⁿ Yã Ndiõxí, chi vitna sa ní cuyatni-gá nduu nàcuaca ñaha Xitohó

Jesucristú xii-o dàcúxí ndèé cùtnàhá ní sándáá iní-ó tñuhu-gá. ¹² Te cada iní-ndó sã dàtná ìⁿ niú sá sà ta cuyatni túndaá, ducaⁿ sãtnahá-xi cùu ñuyíú yíca cuèchi-a chi sa ta cùyatni nduu quixi tucu Xítóhó Jesucristú, te núu xǎⁿ xíní ññuhu-xi dañá-o nchaa sá cuèhé sá dúhá te cada-o mèe-ni sá vǎha, te ducaⁿ te ni ìⁿ sá cuèhé sá dúhá vǎ cúnùu-xi taxi tñuní ñáhá-xí xii-o, te ducaⁿ te vá cúú-gǎ-ó dàtná ñáyiú ndècu núú néé chi cuu-ná-ó dàtná ñáyiú ndècu núú dìtó. ¹³ Te cada-o nchàa nacuaa tàú-xi cunduu cundecu-o dàtná tàú-xi cada ñáyiú ndècu ichi Xítóhó Jesucristú, te vá quìhíⁿ-ó vico cuehé vico duha, te vá cúú-ó ñáyiú quihu, te ni vǎ càháⁿ ndihí-o ñáyiú dìhí te núu ñá díú ñàdihí-ó cùú-yu, te ducaⁿ-ni cuè ñáyiú dìhí tucu vá càháⁿ ndihí-yu tée te núu ñá díú yǐⁿ-yu cùu-güedé, te ni vǎ cùndècu-o ichi díí ìní, te ni vǎ nàá-ó ndihí tñaha ñáyiú-o, te ni vǎ cúú-ó ñáyiú cuédú ìní. ¹⁴ Te vitna nchòhó dañá-ndo mèe-ndo sá Xítóhó Jesucristú ná chindee ñaha-gá xii-ndo càda váha-ndo cundecu-ndo datná quidé mèe-gá ndécú-gǎ, te vá cání-gǎ iní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá iní-ndó.

14

Vá cuátnùhu tñaha-o nacuaa ndècu-o ichi Xítóhó Jesucristú

¹ Te núu ìⁿ ñáyiú ndècu ichi Xítóhó Jesucristú ñá túú tècú tñuní váha-yu nàcuáa cuíní Yǎ Ndiǒxí cadá-yu, te queheⁿ cuèndá-ni-ndǒ-yu te vá ténáá tñahá-ndó ndihí-yu. ² Chi ìó ñáyiú sàni iní sá cúú vǎha iní Yǎ Ndiǒxí sá cúú càxí-yu náni ñihí-yu, te

dava ñáyiú ñá túú cùtnuní váha iní-yu nàcuáa càháⁿ Yă Ndiôxí te mee-ni yŭcú xéxí-yu. ³ Te ñáyiú xèxi nchaa núú sǎ ñihí-yu te vá dáquèe tíhŭ-yu ñáyiú ñá túú xèxi, te ducaⁿ-ni ñáyiú ducaⁿ ñà túú xèxi-áⁿ vǎ cuátnùhú-yu nchaa ñáyiú ducaⁿ xèxi nchaa núú sǎ ñihí-xi-áⁿ, chi tnàhá ñáyiú ducaⁿ xèxi nchaa núú sǎ ñihí-xi-áⁿ quéhéⁿ cuèndá ñáhá Yă Ndiôxí xií-yu. ⁴ Te ñá túú ndècu ndihí-o tnúhu ndee ìní cuatnúhu-o ñáyiú xínu cuechi, chi mee ñáyiú cùu patróôⁿ-yu tàú-yu cáháⁿ-yu te núú cùndáá ñáyiú xínu cuechi núú-yu àdi ñá túú cùndáá-yu. Te ducaⁿ sǎtnahá-xi cùu ñáyiú xínu cuechi núú Yă Ndiôxí, chi mee-gǎ cáháⁿ-gá te núú nása quidé-yu, te ñiu-ni mee-gǎ cada te cundáá-yu cundecú-yu núú-gǎ.

⁵ Te na càchí tnúhu tucu-í xii-ndo sǎ íó ñáyiú càchí sǎ íó dava nduu ío càhnu cuu-xi, te íó tucu dava ñáyiú càchí-yu sǎ ìⁿ-ni cuu-xi nchaa-ni nduu, te xini ñuhu-xi sǎ cùtnuní ndáá iní-yu sǎ ndáá cúú-xí nàcuáa càháⁿ-yu ìⁿ ìⁿ-yu. ⁶ Te ñáyiú cánehe íí dava nduu quidé-yu sǎ néhě-yu sǎ yíñùhu núú Yă Ndiôxí, te ñáyiú càchí sǎ ìⁿ-ní cùu-xi nchaa-ni nduu quidé-yu sǎ néhě-yu sǎ yíñùhu núú Yă Ndiôxí tnàhá-yu. Te ñiu-ni ducaⁿ sǎtnahá-xi cùu nchaa ñáyiú xèxi nchaa nání ñihí-yu, chi quidé-yu sǎ néhě-yu sǎ yíñùhu núú Yă Ndiôxí, chi ndàcáⁿ táhŭ-yu núú-gǎ cuèndá nchaa sǎ ñihí-yu. Te ñiu-ni ducaⁿ sǎtnahá-xi cùu nchaa ñáyiú ñá túú xèxi nchaa núú sǎ nchító-ó chi quidé-yu sǎ néhě-yu sǎ yíñùhu núú Yă Ndiôxí, te ndàcáⁿ táhŭ-yu núú-gǎ cuèndá nchaa sǎ ñihí-yu.

⁷ Te nchoo cuéi vitna ndècu vívú-ó àdi cuéi na

cúú-ó dico ñá díú cuendá méé-ó cúú-ó. ⁸ Chi vitna ndècu vívú-ó te ndècu-o sá cúú-xí Xítóhó Jesucristú àdi cuéi na cúú-ó dico cuú-ó ñu-ni sá cúú-xí-gă, núu xǎⁿ cuéi vitna ndècu vívú-ó àdi cuéi na cúú-ó dico ñu-ni Xítóhó Jesucristú cúú cuendá ñáhă-gă xii-o. ⁹ Chi Xítóhó Jesucristú ní xíhí-gă te ní ndoto-gă, te vitna cùu-gă Xítóhó nchaa ñáyi, cuéi ñáyi xĩndecu vívú te cuéi ñáyi ní xíhí.

¹⁰ Te nchòhó, ñá túú ndùu váha-xi cuatnuhu tnàha-ndo nacuáa ndècu-ndo ichi Xítóhó Jesucristú, te ni ñà túú ndùu váha-xi daquèe tíhú tnáhă-ndó, chi nchaa-o sǎá nduu cùndecu-o núú Xítóhó Jesucristú, te mee-gă cachí-gă te núu ní quide ndáá-ó àdi ñá túú ní quide ndáá-ó. ¹¹ Te Yá Ndiǒxí cǎchí-gă núú tütú-gă:

Yúhú Yă Ndiǒxí ndécú-í cǎchí tnúhu ndáá-í xii-ndo
sǎ nchaa ñáyi ngüñí xítí-yu núu-í,
te ncháa-yu cǎháⁿ-yu sá yúhú cúú-í Ndiǒxí.

Duha cǎchí Yă Ndiǒxí núú tütú-gă. ¹² Núu xǎⁿ nchaa-o ndì díⁿ nàcani tnúhu-o núú Yă Ndiǒxí nchaa sá ní quide-o.

Vá dácuíta nihnu tnàha-o

¹³ Núu xǎⁿ vá cuatnuhu tnaha-gă-ndó, te cada yica-ndo càda-ndo mee-ni sá vǎha, te vá cǎdá-ndó ñⁿ sá ñà túú tàú-ndó càda-ndo cuendá sá vǎ cuíta nihnu dava ñáyi ndècu ndihí-ndo ichi Xítóhó Jesucristú. ¹⁴ Te yúhú ndécú ndihí-í Xítóhó Jesucristú te cùtnuní ndáá iní-í sá ncháa núú sǎ cúú cǎxi-o cuu-ni cǎxi-o te vǎ cúú cuéchi. Te ñáyi sàni iní sá vǎ cúú cǎxi-yu te núu na cǎxi-yu te cuu cuéchi xii-yu. ¹⁵ Te nchòhó, te núu cuendá sá xéxi-ndó nchaa núú sǎ cúú cǎxi-ndo, cuendá xǎⁿ ñá túú-gă cúú vǎha iní nchaa ñáyi ndècu ndihí-ndo ichi

Xítohó Jesucrístú, te ñá túú-gă quidé-ndó sã cúú ìní ndisa-ndõ-yu te núu ducaⁿ na càda-ndo, te núu ìⁿ sá sání ìní-ndó càxi-ndo te cùtnuní ìní-ndó sã xǎⁿ cada-xi cuíta nihnu ñáyiú ndècu ndihí-ndo ichi Xítohó Jesucrístú te vá cáxi-ndó xǎⁿ te núu ducaⁿ, chi Xítohó Jesucrístú ní xíhí-gá cuèndá-yu. ¹⁶ Te núu ìⁿ sá quidé-ndó sàni ìní-ndó sã cúú-xí ìⁿ sá vâha, te ñáyiú càchí-yu sá ñà túú vâha te vá cádá-ndó cuèndá sá vâ càháⁿ cuèhé-yu cuèndá-ndó. ¹⁷ Te sá yíndàha ñaha Yá Ndiõxí xii-o xǎⁿ ío xìni ñuhu-xi cada ndáá-ó cùndecu-o, te cundecu váha ndihí tnàha-o, te cudíí ìní-ó cùndecu-o chi Espíritú-gá ndécú ndihí ñaha-xi xii-o, te nchaa xéhé ïo-gá cúnúu dacúxí sã cóhó sã cáxí-ó. ¹⁸ Te nchaa ñáyiú ducaⁿ quide nchaa sá ïo-gá xíní ñuhu-xi, xinu cuechí-yu núú Xítohó Jesucrístú, te sá dúcáⁿ quidé-yu te ndùu vétú ìní Yá Ndiõxí, te cùdúú-yu núú ñáyiú.

¹⁹ Te nchoo chí ná ndùcu-o nacuáa cada-o cùndecu ndihí váha tnàha-o, te nducu tùcu-o nacuáa cada-o chìndee tnúhu tnàha-o nacuáa cuíta cundáá-gá-ó núú Xítohó Jesucrístú quíhíⁿ. ²⁰ Te ñá díú sã cuèndá ìⁿ núú sã xéxí-ó, te dàquee tíhú-ó sã vâha ní quide ñaha Yá Ndiõxí xii tnàha ñáyiú-o. Te na càchí tnúhu ndáá-í xii-ndo sã ncháá-ní núú sã cúú càxi-o, te dìcò-ni sá ñà túú ndùu váha-xi núú sá cuèndá-ni sá cáxí-ó ìⁿ núú sã cúú càxi-o cuíta nihnu ìⁿ tnàha ñáyiú-o. ²¹ Te váha-gá sá vâ cáxí-ó cùnúú te vá cóhó ndidí, te ni ñà túú nǎgá cada-o te núú xito-o sá xǎⁿ cada te ngúíta tnàha ñáyiú-o càdá-yu sá ñà túú vâha, àdi xito-o sá xǎⁿ cada te ngúíta-yu cani ìⁿ cani úú ìní-yu cundecú-yu ichi Xítohó Jesucrístú, te vá cùndáá-gá-yu núú-gă te

núu ducaⁿ na càda-o. ²² Te núu ìⁿ sá vǎha sàni iní-ó càda-o, te vá dátũu-o núu ñǎyiu chi mee-ni núu Yǎ Ndiǒxí dātúu-o. Te nchoo cùu-o ñǎyiu ío váha táhú-xi te núu cùtnuní ndáá iní-ó sǎ quidé ndáá-ó núu nándi cùu sá quidé-ó, te cùtnuní iní-ó sǎ ñà díú ìⁿ cuéchi cùu-xi sá quidé-ó. ²³ Te núu nchoo sàni iní-ó sǎ quidé vǎha-o àdi ñá túú quide váha-o òré xéxí-ó ìⁿ núu sǎ xéxí-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chi ñá túú ìⁿ-ni sá sání iní-ó, chi nchaa núu sǎ quidé-ó sàni ìⁿ sani úú iní-ó núu váha-ni àdi ñá túú vǎha-ni, te cuu cuéchi xii-o sǎ dúcáⁿ quide-o.

15

Cada-o sǎ vǎha sá cúú-xí tnàha ñáyiu-o

¹ Te nchoo ñáyiu ío váha sàndáá iní ñáhá xii Xítóhó Jesucristú, xini ñuhu-xi cuáñaha-o tnũhu ndee iní xii ñáyiu ñá túú ñihí ndéé cùndecu ichi-gá, te vá cadá-ó mée-ni sá cúú-xí mée-o. ² Te cada-o sǎ vǎha nàcuáa cuu váha iní tnàha ñáyiu-o cuendá cuu-xi sá vǎha sá cúú-xí-yu, te ducaⁿ cuita ñihí ndéé-gǎ-yu quindáá iní-yu Xítóhó Jesucristú. ³ Te Xítóhó Jesucristú ñá túú ní quide-gá mee-ni sǎ cúú vǎha iní mée-gǎ, te ní quee ndáá-xi nàcuáa càháⁿ-xi núu tütú Yǎ Ndiǒxí nàcuáa ní xáhaⁿ Xítóhó Jesucristú xii-gá, te càchí-xi: “Nchaa ñáyiu cùu úhú iní ñáhá xii-n ní xícuèhé ní xíduha ñáhá-yu xii-í”, duha càháⁿ-xi núu tütú Yǎ Ndiǒxí nàcuáa ní xáhaⁿ Xítóhó Jesucristú xii-gá. ⁴ Te ndéé sanaha ñi ngúndeé nchaa tnúhu Yá Ndiǒxí núu tütú-gá, te ducaⁿ ñi ngúndeé cuendá dacuàha-o, te tnúhu-áⁿ dánèhé ñáhá-xí cùnduu cahnu iní-ó cuèi nándi nà yáha-o cùndecu-o ichi-gá,

te sá xí tñũhu-áⁿ te vá ndìhú-gá iní-ó cùndecu-o, te ðiu-ni sá xí tñũhu-áⁿ cundecu ndìhi-o tñũhu ndee iní. ⁵ Te Yá Ndiõxí quidé-gã ndécú ndìhi-o tnúhu càhnu iní, te ðiu-ni-gá quidé-gã ñã túú ndìhú iní-ó ndècu-o. Te xicáⁿ táhù-í núú-gã sá ðíú-gã ná cádá te cuu ìⁿnuu-ndo cùndecu-ndo datná ní quide mee Xítohó Jesucristú cùtnàhá ní xíndecu-gã ñuyíú-a. ⁶ Te ducaⁿ nchàa-ndo cuu ìⁿnuu-ndo, te danìhí tnáhá-ndó yõcó tãchí-ndó te cachí-ndó sã ïo càhnu cuu Yá Ndiõxí Yaá cúú Tãtá Xítohó Jesucristú.

Ñáyiu ñã túú cùu ñáyiu isràél ní nĩhĩ-yu tnúhu Xítohó Jesucristú

⁷ Te núu xiãⁿ chí quéhéⁿ cuendá tnáhá dàtná ní quide Xítohó Jesucristú ní queheⁿ cuendá ñáhá-gã xii-o, te núu ducaⁿ na càda-ndo te ío cuu càhnu Yá Ndiõxí. ⁸ Te na càchí tnúhu-í xii-ndo sã Xítohó Jesucristú ní quixi-gá ní quide-gá sá vãha sá cúú-xí ñáyiu isràél, te sá dúcáⁿ ñĩ quide-gá xiãⁿ cùtnùní ndáá iní-ó sã Yã Ndiõxí quidé-gã ìⁿ sá càháⁿ-gá, chí Xítohó Jesucristú ní quide-gá nchaa nàcuáa ní xáhaⁿ Yã Ndiõxí xii cue ñaní tnáhá-ó ñĩ xíndecu ndéé sanaha. ⁹ Te ducaⁿ ñĩ quide Xítohó Jesucristú sá vãha sá cúú-xí ñáyiu isràél cuendá nchaa ñáyiu ñã túú cùu ñáyiu isràél cachí-yu sá ïo càhnu cuu Yá Ndiõxí, te ducaⁿ quèsahá-yu chí ío cùndahú iní ñáhá-gã chíndèe ñaha-gá xií-yu, te quee ndáá-xi nàcuáa càháⁿ-xi núú tütú Yã Ndiõxí núú càchí-xi: Yúhú cachí-í sá ïo càhnu cuu-n núú nchàa ñáyiu ñã túú cùu ñáyiu isràél, te cata-í ndudú chiñuhu ñaha-ĩ xii-n. Duha càchí-xi núú tütú-gá ¹⁰ Te càchí tucu-xi núú tütú-gá:

Te nchòhó ñáyiú ñá túú cùu ñáyiú isràél ío chí cúdǎí
 ìní ndìhi ñáyiú isràél ñáyiú ndècu ndìhi-í.
 Duha càchí-xi núú tütú-gá. ¹¹ Te càchí tucu-xi ìngá
 xichi núú tütú-gá:

Nchaa nchòhó ñáyiú ñá túú cùu ñáyiú isràél chí
 càháⁿ sá ìo càhnu cuu Yá Ndiǒxí,
 te nchaa ñáyiú na càháⁿ-yu sá ìo càhnu cuu-gá.
 Duha càchí-xi núú tütú-gá. ¹² Te ndí Chàìá càchí
 tucu ndí núú tütú Yă Ndiǒxí:
 Coò ìⁿ ñaní tnáhá ndí Isàì téé ní xíndecu ndéé
 sanaha,
 te téé-áⁿ taxi tnùnì-dé cue ñáyiú ñá túú cùu ñáyiú
 isràél,
 te ñáyiú-áⁿ cundee cùu cahnu ìní ñáhă-yu xii-dé.
 Duha ní càháⁿ ndí Chàìá càchí-xi núú tütú-gá.

¹³ Te xicáⁿ táhù-í núú Yă Ndiǒxí Yaá ní taxi
 tnúhu ndee ìní ndécú ndìhi-o sá méé-gă ná càda
 ío cudǎí ìní-ndó cùndecu-ndo, te ducaⁿ ìo váha
 cundecu ìní-ndó nǔú-gă chí sàndáá ìní-ndó-gă, te
 ducaⁿ Espiritú-gá ná càda te uuⁿ-gá uuⁿ-gá cuita
 ngúndecu ndìhi-ndo tnúhu ndee ìní quíhíⁿ sá cáda
 váha ñaha-gă xii-ndo.

¹⁴ Te nchòhó ñáyiú ndècu ndìhi-í ichi Xítóhó
 Jesucrìstú cùtnuní ndáá ìní-í sá nchòhó ío váha
 ìní-ndó, te ducaⁿ ìo váha cùtnuní ìní-ndó nchàa
 tnúhu váha, te ducaⁿ ìo dàsahú tnáhá-ndó nàcuáa
 cundecu-ndo. ¹⁵ Te dava tnúhu ní chídó tnùnì-í
 núú tütú-a cùu-xi tnúhu sá ìo càháⁿ-í dóho-ndo, te
 ducaⁿ nǎ tee-í cuèndá sá nchòhó dandàcu ìní-ndó
 tnúhu-áⁿ, te ní tee-í chí Yá Ndiǒxí ní cundàhú ìní
 ñáhá-gă xii-í ní taxi-gá chùⁿ quide-í ¹⁶ xínú cuèchi-í
 núú Xítóhó Jesucrìstú càháⁿ-í tnúhu-gá núú ñáyiú
 ñá túú cùu ñáyiú isràél. Te tnúhu-áⁿ cúú-xí tnúhu sá

sánú ìchi ñaha xii-o nacuáa naníhí tàhú-ó, te ducaⁿ dànehé-í ñáyiú ñá túú cùu ñáyiú isràél tnúhu Yá Ndiöxí cuèndá cuú-yu dàtná ìⁿ sá ndúú tǎhú-gǎ, te Espíritú-gá quidé-xí cùu-yu ñáyiú cùd̄iú núú-gǎ, te cùu váha iní ñáhá-gǎ xií-yu.

¹⁷ Te ío váha cùu iní-í cuèndá nchaa ch̄iúⁿ quide-í sá cúú-xí Yǎ Ndiöxí, chi Xítóhó Jesucrístú ndécú nd̄i^hi ñaha-gá xii-í. ¹⁸ Te mee-ni nàcuáa quide Xítóhó Jesucrístú ch̄indèe ñaha-gá xii-í xǎⁿ-ni càháⁿ-í, te sá dúcáⁿ quide-gá xǎⁿ ní sándáá iní cue ñáyiú ñá túú cùu ñáyiú isràél tnúhu-gá. Te ducaⁿ chi ní chindee ñàha-gá xii-í ní càháⁿ-í tnúhu-gá te ducaⁿ-ni ñí chindee ñàha-gá xii-í ní quide-í t̄itn̄í núú sǎ ñí quide-í núú-yu ní xiní-yu. ¹⁹ Te Espíritú Yǎ Ndiöxí ní quide-xi ní quide-í t̄itn̄í núú sǎ vǎ yǒo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáháⁿ-í ní càháⁿ-í tnúhu Xítóhó Jesucrístú núú ñáyiú cuèi ndéé ñuú Jerusàlén, te cuèi ndéé distritú Ìlírícú, núu nchaa ñuú-áⁿ ñí sáháⁿ-í ní càháⁿ-í núú-yu tnúhu sá càháⁿ nàcuáa naníhí tàhú-ó. ²⁰ Te ducaⁿ ìo ndùcu ndee-í càháⁿ-í tnúhu sá càháⁿ nàcuáa naníhí tàhú-ó núú vǎtá ñihí-gá-yu tnúhu cuèndá Xítóhó Jesucrístú, te ducaⁿ quide-í chi ñá túú cuiní-í quíh̄íⁿ-í càháⁿ-í tnúhu-gá núú sà x̄indecu ñáyiú càháⁿ tnúhu-gá. ²¹ Te quide-í nàcuáa càháⁿ-xi núú t̄utú Yǎ Ndiöxí núú càchí-xi:

Ñáyiú vǎtá ñihí-gá tnúhu cuèndá Yaá quixi ñuyíú te níh̄i-yu,

te ducaⁿ tècú tnùní-yu tnúhu-gá.

Duha càchí-xi núú t̄utú-gá.

Té Pǎblú cuiní-dé quíh̄íⁿ-dé ñuú Rómá

22 Te sá dúcáⁿ càháⁿ-í tnúhu-gá nõu xiǎⁿ ñá túú ní ndàcu-í quixi-í quixi coto ñaha-ĩ xii-ndo cuẽi ducaⁿ-ni sàni iní-í quixi coto ñaha-ĩ. 23 Te ní cuu titní cuía ducaⁿ-ni sàni iní-í quixi coto ñaha-ĩ xii-ndo, te vitna ní ndihi-í nchaa iha ní cáháⁿ-í tnúhu Xítohó Jesucristú núú nchaa ñáyiú. 24 Núu xiǎⁿ sání iní-í sá ndùu na quihíⁿ-í nacióⁿ Èspaña te yáha cáháⁿ-í quini-í nása ndècu-ndo, te dàvá-áⁿ ïo cudí^í iní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee iní-ndó chindee ñaha-ndo xii-í. 25 Te vitna quihíⁿ-í ñuú Jerusálén quínehe-í sá ndúú tǎhú ñáyiú ndècu ichi Xítohó Jesucristú xíndecu yàcáⁿ. 26 Te ñáyiú xíndecu ichi Xítohó Jesucristú ndécú dístítú Macèdoniá, ndihi dístítú Acáyá ní cuu ìⁿnùú-yu ní sacáⁿ tnáhã-yu sá ndúú tǎhú ñáyiú ndàhú xíndecu ichi-gá ndécú ñuú Jerusálén. 27 Te ducaⁿ tnàhí ní cudí^í iní-yu cadá-yu, te ducaⁿ tnàhí tàú-yu cadá-yu chindèé-yu ñáyiú xíndecu ñuú Jerusálén. Te ñáyiú Macèdoniá ndihi ñáyiú Acáyá-áⁿ ñà túú cùú-yu ñáyiú isràél. Te ñáyiú xíndecu ñuú Jerusálén cúú-yu mee-ni ñáyiú isràél, te ducaⁿ tàú-yu cadá-yu chi sá cuèndá ñáyiú isràél-áⁿ ñí níhí-yu tnúhu sá càháⁿ nàcuáa naníhí tǎhú-yu, núu xiǎⁿ tàú-yu chindee ñàhá-yu ndihi nchaa sá nihí-yu. 28 Te sátá ná yáha quínguáha cuèndá-í-yu sá ndúú tǎhú-yu, te ducaⁿ te dǎtnùní quee-í quihíⁿ-í nacióⁿ Èspaña, te ichi yáha-í yáha cáháⁿ-í núú ndécú-ndó. 29 Te cùtnuní ndáá iní-í sá òré ná quèxio-í núú ndécú-ndó, te Xítohó Jesucristú ïo chindee ñàha-gá xii-í cáháⁿ-í tnúhu-gá núú-ndó nàcuáa ïo váha cundecu-ndo ìchi-gá.

30 Te nchòhó ñáyiú ndècu ndihi-í ichi Xítohó

Jesucristú càháⁿ ndàhú-í núú-ndó sã ïo chindee ñàha-ndo xii-í cáháⁿ ndihì-o Yã Ndiöxí cuendá-í, te ducaⁿ càda-ndo chi ndècu ndihì-ndo Xítóhó Jesucristú. Te Espiritú Yã Ndiöxí quidé-xí cùu iní tnáhá-ó ìⁿ ìⁿ-o. ³¹ Te ío chí càcáⁿ táhú nǔú Yã Ndiöxí sá ná còto ñaha-gá xii-í, te ñá túú nã cada ñaha nchàa ñáyiú ñá túú sàndáá iní ñáhá xì-gá xĩndecu distritú Jùdeá. Te cacáⁿ táhú tùcu-ndo núú-gã sá ncháá sã cánèhe-í quíhíⁿ nduu táhú ñáyiú ndècu ichi-gá ndécú ñúú Jerusàlén ío váha cuu iní-yu queheⁿ cuendá-yu. ³² Te ducaⁿ càda-ndo cuendá sá nǔu Yã Ndiöxí ná cächí-gá te ío cudíí iní-í òré quexìo-í núú ndécú-ndó, te ío váha cuu iní-í cundecu ndihì ñaha tnài xii-ndo. ³³ Te vitna xìcáⁿ táhú-í núú Yã Ndiöxí Yaá quidé ïo váha cùu iní-ó ndècu-o sá ná chindee chitúu ñaha-gã xii-ndo nchàa-ndo. Te ducaⁿ na cùnduu.

16

Té Pãblú quidé ndèe iní-dé ñáyiú ndècu ñúú Rómá

¹ Te yúhú tendaha-ĩ tá Fèbé quixi-xi núú ndécú-ndó, te tnáhá-xi ndècu-xi ichi Xítóhó Jesucristú, te quide-xi chiuⁿ Yã Ndiöxí sá cúú-xí ñáyiú ndècu ichi Xítóhó Jesucristú xĩndecu ñúú Cèncreá. ² Te cuini-í sá ïo váha cuu iní-ndó queheⁿ cuendá-ndó-xí, chi ndècu ndihì-xi Xítóhó Jesucristú, te cada-ndo nàcuáa tàú-xi cunduu dàtná tàú-xi cada ñáyiú ndècu ichi-gá, te ío chindee-ndo-xi te núu ná cúú sã xíní ñùhu-xi, chi tnáhá-xi ío chindee-xi cue ñáyiú ndècu ichi Xítóhó Jesucristú, te tnáhá yúhú ducaⁿ ïo chindee-xi.

³ Te cúñaha-ndo ïo na càda ndee iní té Àquilú ndihì ñadhí-dé tá Priscilá, chi ñáyi-u-áⁿ ñi quide chiⁿ-í ndihí-yu ní quide-ndí chiⁿ Xítohó Jesucristú. ⁴ Chi mée-yu ní cácu cuú-yu sá cuèndá sá ñi dácacu ñahá-yu xii-í sá ñi yáha-í, núu xíⁿ ío ndàcáⁿ táhù-í núy-yu, te ñá díú-ní yǔhú ducaⁿ ïo ndàcáⁿ táhù-í núy-yu chi tnàhá nchaa ñáyi-u ñá túu cùu ñáyi-u isràél xĩndecu ichi-gá xĩndecu nchaa xichi ducaⁿ ïo ndàcáⁿ táhũ-yu núú tẽ Àquilú ndihì núú ñadhí-dé tá Priscilá. ⁵ Te cúñaha tucu-ndo sá ïo na càda ndee iní nchaa ñáyi-u xĩndecu ichi Xítohó Jesucristú tàcá vehe té Àquilú ndihì tá Priscilá dácuahá-yu tnúhu-gá, te cúñaha tucu-ndo sá ïo na càda ndee iní té Epènetú chi tnàhá-dé ío ñùhu iní-í-dé, chi tée-áⁿ cúú-dě tée díhna nuu ñi sándáá iní tnúhu Xítohó Jesucristú distritú Acáyá. ⁶ Te cúñaha tucu-ndo sá ïo na càda ndee iní tá Màriá xíchí ndécú ndihì-ndo, xíchí ïo ndùcu ndee xinu cuechi núú Xítohó Jesucristú. ⁷ Te cúñaha tucu-ndo sá ïo na càda ndee iní cue tée cùu ndi mee-í té Àndrónicú ndihì té Jùniás, chi tnàhá-güedé ní xihì ndihì ñaha-güedě xii-í vecaá, te ío cùdiu-güedé núu nchàa cue tée ní táúchíuⁿ Jèsús cáháⁿ tnúhu-gá. Te díhna-gá-güedé ní sándáá iní-güedé tnúhu Xítohó Jesucristú dàcúxí yǔhú.

⁸ Te cúñaha-ndo sá ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú. ⁹ Te cúñaha tucu-ndo xii té Bǎnú tée cùndihì ñaha xii-o quide-o chiⁿ Xítohó Jesucristú sá ná càda ndee iní-dé, te cúñaha tucu-ndo xii té Èstaquís sá ná càda ndee iní-dé chi tnàhá-dé ío ñùhu iní-í-dé. ¹⁰ Te cúñaha tucu-ndo xii té Àpelés sá

10 ɨo na càda ndee iní-dé, chi téé-áⁿ ɨo váha cùndáá-dé núú Xítóhó Jesucrístú, te cúñaha tùcu-ndo xii ñáyiu xĩndecu vehe té Aristóbulú sá ɨo na càda ndee iní-yu. 11 Te cúñaha-ndo xii té Heròdiòn téé cùu ndi mee-í sá ɨo na càda ndee iní-dé, te cúñaha-ndo xii ñáyiu ndècu ichi Xítóhó Jesucrístú xĩndecu vehe té Nàrcisú sá ɨo na càda ndee iní-yu. 12 Te cúñaha-ndo xii tnahá tá Trifená ndihí tá Trifosá sá ɨo na càda ndee iní-yu, chi tnahá-yu quidé-yu chi^u Xítóhó Jesucrístú. Te tnahá tá Pěrsidá xíchí ndécú ndihí-o ichi Xítóhó Jesucrístú cúñaha-ndo xii-xi sá ɨo na càda ndee iní-xi, chi tnahá-xi ɨo ndècu ndee-xi quide-xi chiuⁿ Xítóhó Jesucrístú. 13 Te cúñaha-ndo tnahá té Rűfú téé ɨo váha sàndáá iní tnúhu Xítóhó Jesucrístú sá ɨo na càda ndee iní-dé ndihí náná-dě, chi ñaha-áⁿ quidé iní-í sá cúú-áⁿ dàtná nánà-í. 14 Te cúñaha-ndo sá ɨo na càda ndee iní té Àsíncritú, ndihí té Flègonté, ndihí té Hěrmás, ndihí té Pàtrobás, ndihí té Hěrmés, ndihí nchaa dava-gá cue ñáyiu ndècu ndihí-o ichi Xítóhó Jesucrístú xĩndecu ndihí-güedé. 15 Te cúñaha tùcu-ndo sá ɨo na càda ndee iní té Filológó, ndihí tá Jůliá, ndihí té Nèreú, ndihí cúha té Nèreú, ndihí tá Òлимпás, ndihí nchaa dava-gá ñáyiu sàndáá iní tnúhu Xítóhó Jesucrístú xĩndecu ndihí-yu.

16 Te ɨo yiñúhu cada ndee iní tnahá-ndó ɨⁿ ɨⁿ-ndo. Te nchaa ñáyiu tàcá nchaa iha dàcuaha tnúhu Xítóhó Jesucrístú quidé ndèe iní ñáhă-yu xii-ndo.

17 Te nchòhó ñáyiu ndècu ndihí-í ichi Xítóhó Jesucrístú càháⁿ-í dóho-ndo sá cádá cuendá-ndó nũu ɨó ñáyiu quide nacúáa vá cúú ɨⁿnuu-ndo cundecu-ndo, chi ñáyiu-áⁿ sánú ichi ñahá-yu ɨⁿ ichi ñá túú văha, chi ñá túú ɨⁿ-ni cuu-xi tnúhu càháⁿ-yu

ndihi tnúhu sá nĩ níhí-ndó ndècu ndihi-ndo, te ñáyiú ducaⁿ xĩquide vá nihí tnáhá-gă-ndó ndihí-yu. ¹⁸ Chi ñáyiú-án ñà túú quidé-yu chiúⁿ sá cúú-xí Xítóhó Jesucristú, chi mee-ni sã cúú-xí mèé-yu quidé-yu, te mee-ni nchaa tnúhu sá ïo vii ío váha cuáháⁿ càháⁿ-yu òré cuáháⁿ-yu dândahú-yu nchaa ñáyiú ío yáchí sàndáá iní-xi ìⁿ tnúhu. ¹⁹ Te nchaa ñáyiú nihí-yu tnúhu sá nchòhó sàndáá iní-ndó tnúhu Xítóhó Jesucristú, núu xĩáⁿ ío cùdíí iní-í. Te cùiní-í sá nchòhó ío váha cutnùní iní-ndó nàcuáa cada-ndo mèe-ni sá vãha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha. ²⁰ Te Yá Ndiõxí Yaá quidé ïo váha cùu iní-ó ndècu-o ío ndihi cada-gá cuèndá sá sàcuíhná ñà túú-gă ná cada ñaha-xi xii-ndo, te xicáⁿ táhù-í núú Xítóhó Jesucristú sá ïo na chindee chitúu ñaha-gă xii-ndo.

²¹ Te té Timùteú téé quide ndihi-í chiúⁿ Xítóhó Jesucristú iha quide ndee iní ñáhá-dě xii-ndo, te tnáhá té Lùciú, ndihi té Jàsón, ndihi té Sosipàtér cue téé cùu ndi mee-í quidé ndèe iní ñáhá-güedě xii-ndo.

²² Te tnáhá yúhú té Tèrciú téé càdúha tutú-a cuèndá té Păblú quidé ndèe iní ñáhà-í xii-ndo, chi ìⁿ-ni cùu-o ndihi Xítóhó Jesucristú.

²³ Te tnáhá té Găyú téé dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítóhó Jesucristú. Te tnáhá té Èrastú téé yìndaha díhúⁿ ñúú quidé ndèe iní ñáhá-dě xii-ndo, te tnáhá té Cuártú téé ndècu ndihi-o ichi Xítóhó Jesucristú quidé ndèe iní ñáhá-dě xii-ndo.

24 Te xìcáⁿ táhù-í núú Xítóhó Jesucrìstú sá ïo na chìndee chítúu ñaha-gă xii-ndo nchàa-ndo. Te ducaⁿ na cùnduu.

Cáháⁿ-ó sǎ ïo cǎhnu cuu Yá Ndiǒxí

25 Te vitna chí ná cǎchí-ó sǎ ïo cǎhnu cuu Yá Ndiǒxí, chí mee-gă cada te ío-gá cuita níhí ndéé-gă-ndó cùndecu-ndo ichi Xítóhó Jesucrìstú dàtná cǎchí tnúhu sá cǎháⁿ nàcuáa naníhí tàhú-ó, tnúhu sá dánèhé-í ñáyiú cuèndá Xítóhó Jesucrìstú, te nchaa tnúhu-a ñⁿ-ni cùu-xi ndihì nchaa tnúhu sá ñ cǎchí Yá Ndiǒxí cuu yuhu ndéé cútnàhá ní ngáva ñuyíú, te vitna ní quee túu-xi, ²⁶ chí mee Yá Ndiǒxí ní dátüu-gá núú-ó vitna, te cǎháⁿ-ndí nàcuáa ní chídó tnùnì cue téé ní xóo cǎháⁿ tnúhu Yá Ndiǒxí ndéé sanaha. Te ducaⁿ tnúhu sá ndúú yùhu ni cuu ta xíté nuu-xi ñihì ñuyíú cuǎháⁿ, chí ducaⁿ ñ cǎchí Yá Ndiǒxí Yaá ndécú nchàa nduu nchaa quíú cunduu cuèndá sá quèndáá iní ñáhá ñáyiú xii-gá, te tní-yu nchaa tnúhu cǎháⁿ-gá.

27 ¡Te ñⁿdìi-ni Yá Ndiǒxí cúú-gă Yaá ío sàá sá xìnì tnùnì-xi! ¡Te nchaa-o chí ná cǎchí-ó sǎ ïo cǎhnu cuu-gá, chí ndècu ndihì-o Xítóhó Jesucrìstú, te ducaⁿ-ni càda-o ni caa ni quíhí! Te ducaⁿ na cùnduu. Te ío chí cádá ndèe iní-nǎ vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939